

APOKALUPO

Ai Peba Ngena Tääpu Myene

1 ¹ Ai mene lui eei gwidape poto cidi me Acejiyame lui bine eboclomäjimuji Yeesu Keriso bau me. Tabe naace name pi eboclomäjimuji, egä Keriso te piba teeme kaakesea bägrä bime bau me aboclomäjame ngena cina mameta gemi äpletnera. Siige Keriso te tityepuji teeme mename seemo ne ai gwidape bine aboclomäjame teeme kaakesea bägrä Yoane bau me. ² Yoane ituge jajanena iyeta, tabe lui ituge päpänenä. Pui lui Acejiyame ngena ituge iicema piiyepu Yeesu Keriso ngena ituge aitneja. ³ Gege gyene laati te yaacnuge ai peba ne ciige mule poto cidi me; cuta gege gemi laatibi yäätəcijemuge, siige yäacwetnusi, ingle padare mameta gyene ai gwidape cina äpletnerame.

Yoane Jewablenemige Seben Ätrunga Ingle bine

⁴ Cane Yoane ai mene ne yoogärenine seben ätrunga ingle cabu me Asiya probins ngalebora. Miiji piiyepu poode weeme bau me Acejiyame bau ca, lui tage niinäce gaabe je, lui sine page, cuta lui te iyeteta cire yaanajepi, piiyepu seben seemo bime bau ca, teeme babo adnata puupu opo gaabe je lui cina icrajenemige; ⁵ cuta piiyepu Yeesu Keriso bau ca, lui te cängenarage teitnejanumi toraca mene ne, lui te niinäce gaabe biname gyene budre cabu ca arpinentame, piiyepu lui te niinäce gaabe biname gyene iyeta gawe maramara mope biname bime tääpume ai gawecewe cabu ta.

Yeesu Keriso singi gyene mime tääpume, tabe teeme uudi ca mibibine kälyä ituge wawena mime niya mule cabu ca. ⁶ Tabe niwenininuji iiwäreja biname me lenajame, lui cina ten cama pagege biname bine waadena, piiyepu Acejiyame teeme Babe tääpume pagege kaakesea wawena. Tabe baborage apaclyera piiyepu kokre cama iyeteta lenajame. Ai mene toraca gyene.

⁷ Itəcijinege! Tabe carbe cabu cire tädepi! Iyeta biname cina cirege teebine päpäna, cuta eei cina lui teebine jigadujisi kalaku ca. Iyeta biname cina ele cire yaangenetnemepi teeme tääpume. Ai lui toraca mene gyene.

⁸ Yageyame, babo kokre Acejiyame, lui sine page, lui tage niinäce gaabe je, cuta cire yaanajepi iyeteta, tabe apu jiičenige egä, “Nuuja gwidape camu ge, cane lui uja ge; cuta liba cire lapiripesi, cane cire nanajepi.”

Keriso Aboclomtige Yoane bau me

⁹ Cane Yoane weene cama yepä ätrunga biname gäne. Mine iyeta Keriso me binamewale gemi. Cane epu mäpu cabu nanajinige weene liiyepu. Iyeta mibibine Yeesu Keriso te niwadininige, cuta mine iyeta miiji mäpu cabu bojäcu lenaja. Ingle cane Acejiyame me Mene ne secanenäjumene, biname bine tejanenäjumumene Yeesu poto cidi me, peei name pi noomlujisi, nacitujisi curä cabu me ngii Patmos. ¹⁰ Yageyame me bimu^a cabu Aceji Seemo te puga nacenanuji, siige cane nätecijuji căme kaake poto cidi ca baborage tagepogogo, moole ala liiyepu. ¹¹ Tabe najuji egä, “Maane ngena bine jepānanenenemite, peba cabu yoogāremepi, jityepemepi ätrunga ingle bime cabu me seben maramara cewe cabu me, Epeso me, Mirina me, Pergamo me, Tiyatira me, Sardi me, Piladelpiya me, Laodikea me.”

¹² Cane atarongtujine, egä laati te mene najaninige, siige cane jepānimujine seben lampa dade bine, lui gol ca wawenāneji ge. ¹³ Pui gome cane jepānujine lui te biname pana ge. Tabe lecaleca căbletāäpe asigrāneji ge, gol seea ca amlmalteji ge dare gome. ¹⁴ Teeme mope piiyepu edingāli bulu taatu ge, epu pana egimope carbe coo säāwiye me ngāli liiyepu. Teeme irecu cina uliobo pana ayenujāsi. ¹⁵ Teeme ernge toplacmujāsi ayiayi braasi ayana liiyepu. Teeme tagepogogo epu pana ge, niye te lipu podo cabu ca täcwājicuge babo ala cama. ¹⁶ Teeme camu poto ime cabu puga ge seben wale. Tage cabu ca cubuturikā te tasatuji, neeneni poto äsweji ge, girirage. Teeme opo lui epu pana, bimu apacljera te lipu baborage yaanajuge bimu duusa je.

¹⁷ Cane liba jepānujine teebine, teeme ernge gawe me natramuji budre pana. Tabe puma cita ca teeme camu poto ime ne secituji căme papa cabu, najuji egä, “Wālu gone! Cane niinācerage gäne, cuta cerācerägāāburage gäne. ¹⁸ Cane ireclotayame gäne. Cane budre äbitujine, cuta arpinantujine, siige cane iyeteta, iyeteta gäne. Cane budre ne ituge apremela piiyepu cane te joomlenine aadiri täāpume kii ne. ¹⁹ PEEI name pi maane yoogāremepi, maane lui gwidape bine jepānenemite page, cuta lui cina ingwe ca cire läbitipesi. ²⁰ Cane naaboclomtenine, căme ime cabu lui seben wale ngeno memi, cuta seben gol ca wawenāneji lampa dade ngeno memi. Seben wale lui seben ätrunga ingle bime seben mename seemo gemi, piiyepu seben lampa dade lui pui seben ätrunga ingle gemi.”

^a 1:10 Yageyame me bimu: Ama Yageyame me bimu lui Sande bimu gyene.

Mene Epeso Ätrunga Ingle bau me

2 ¹“Yoogärepi Epeso ätrunga ingle me mename seemo bau me egä, ‘Lui te joomlemenige seben wale bine camu poto ime ca piyepu lui te otnenige seben gol ca wawenäneji lampa dade gome, tabe apu jiicenige egä: ²Cane umle gäne iyeta weeme poto cidi me. Cane umle gäne weene lipu kokre cama kaakesea itu jaawenemepeye, cuta weene lipu bojäcu ituge lenaja mäpu cabu. Cane umle gäne, egä weene ire taatu lica jaacranimuye niya mule biname bine; cuta weene itu yaapicetnäremepeye lui cina jiicusi egä teepi Keriso me ätyepäneji biname gemi, yepä teepi lica. Weene ituge päpäna, egä teepi walya biname gemi. ³Weene bojäcu inajininige mäpu cabu; weene bucurage mäpu bine itu jääpänemepeye căme name pi, yepä weene lica luucratnipeye. ⁴Yepä age sena cane lui täapume singi lica, egä weene lipu niinăce singi căme täapume, weene pipu singi ne ituge abmala. ⁵Weene ngene jotwipeye, egä niinăce weene lipu ituge lenaja, siige tatatrongäripeye, jewenepeye weene niinăce lipu ituge wawena. Weene liba atatrongära căco, cane ädenine, iyeblingtenine weeme lampa dade ne teeme puupu cabu ca.

⁶Yepä weeme pisi nyene cane lui mule täapume singi: weene jäägyemuye Nikolayame biname^b bime mule bine, cane lipu jäägyemune.

⁷Weeme liba tablame piti nemi ätecijame, itecijinege, Aceji Seemo te ngena jejenenemige ätrunga maramara ingle bine. Laati te cire yuutrutepi, cane cire jaajepene tabe kuu loolo me ireclota uli cabu ca, Acejiyame me calwacupi cabu lui te uutenige.’ ”

Mene Mirina Ätrunga Ingle bau me

⁸“Yoogärepi Mirina ätrunga ingle me mename seemo bau me egä, ‘Lui te niinăcerage gyene, cuta cerăcerägääburage gyene, lui te budre äbituji, cuta arpinantuji, tabe te jiicenige egä: ⁹Cane umle gäne weeme mäpu; cane umle gäne egä weene gwidape căco gemi, yepä toraca weene dogwe biname gemi. Cane umle gäne lipu niyaniya mene jiicemusi weeme poto cidi me, lui cina lainininusi Israela biname ca, yepä teepi lica. Teepi Satani me ingle biname gemi. ¹⁰Weene wălu gone läbitininuye, weene lui mäpu ne mameta gemi päpäna. Itecijinege! Satani te singi gyene weeme poto bine krokeciye mete cabu me acraname weebibine apicetnärame. Weene pagege peei mäpu cabu ten bimu cama lenaja. Ngănu gyene, teepi budre me piglecipesi, yepä weene gone nabmaluye cebine, cane piba iyeteta ireclota cire icăripene.

^b 2:6 Nikolayame biname: Nikolayame biname lui eei gemi lui cina uuje bine iiwărăneji deedei bine yäärwăjimusi piyepu sargi mule jaawenimusi.

¹¹Weeme liba tablame piti nemi äteciame, weene iteciame, Aceji Seemo te ngena jejenemige ätrunga maramara ingle bine. Laati te cire yuutrutepi, teebine neeneni me budre^c te lica sabe cire jaawenepi.’ ”

Mene Pergamo Ätrunga Ingle bau me

¹²“Yoogärepi Pergamo ätrunga ingle me mename seemo bau me egä, ‘Lui me cubuturikä pisi nyene, neeneni poto äsweji ge, tabe jicenge egä: ¹³Cane umle gäne egä weene luma inajinige, Satani te puma biname bine ewadenemige, yepä weene toraca gemi căme täapume. Antipa lui te toraca naitnäjuji cebine, teebine liba budre me eglujisi puma Satani te luma enajenige, cuta pui padare cabu weene ätrunga ne lica ebmalujiye. ¹⁴Yepä weeme piti nemi nesae căme singi căco mule. Weeme poto cina Balam me abiberäja ne ingwe icwetniniye. Tabe peese nyene, lui te jejuji Balaki ne tabe Israela biname bine opo ire waweneme cibi ärngäame, lui cibi ca uuje bine ituge iiwäreja, cuta piyepu sargi mule waweneme. ¹⁵Piyepu weene poto piti nemi, lui cina ingwe icwetniniye Nikolayame biname bime abiberäja ne. ¹⁶Peei name pi weene tatatrongäripeye weeme niya mule cabu ca, cije cane lädune pui biname bime cama cubu iicaname cubuturikä ca, căme tage cabu ca lui te tasatenige.

¹⁷Weeme liba tablame piti nemi äteciame, iteciame, Aceji Seemo te ngena jejenemige ätrunga maramara ingle bine. Laati te cire yuutrutepi, cane teebine cirege ämlitäneji deedei ngii maana ceera piyepu bulubulu kula ceera kirece ngii cama. Nuuja te umle lica birige, nuuja me kula cabu ngena ngii, yepä lui te yaacatuge, tabe taatu umle birige.’ ”

Mene Tiyatira Ätrunga Ingle bau me

¹⁸“Yoogärepi Tiyatira ätrunga ingle me mename seemo bau me egä, ‘Acejiame me Bägrä lui me irecu cina ayenäsi uliobo pana piyepu lui me ernge oplacmeläja braasi ayana pana gegi, tabe jicenge egä: ¹⁹Cane umle gäne iyeta weeme poto cidi me. Cane umle gäne, weene lipu singi gemi biname bime täapume, lipu toraca gemi, lipu kaakesea jewenenemiye piyepu mäpu cabu lipu kokre inajinige. Cane cuta umle gäne, egä weene page magerage kaakesea jewenenemiye niinäce kaakesea cabu ca. ²⁰Yepä weeme pisi nyene căme singi căco mule. Weene ire taatu jociteniye magebi ngii Isabela ne, lui te lainuge Acejiame me mename biname ca. Tabe căme kaakesea bägrä bine ebiberäjenemige, opo jewenenemige conocono gaabe cabu otnime sargi mule waweneme

^c 2:11 neeneni me budre: Neeneni me budre poto cidi me mene cuta pisi nyene Apokalupo 20:14 cabu piyepu Apokalupo 21:8 cabu.

piiyepu cibi ärngäjame, lui ca yiwäräjemus i uuje bine. ²¹Cane padare tocärumene tabe atatröngtame teeme niya mule cabu ca, yepä tabe singi lica teeme sargi mule ne abmalame. ²²Peei name pi cane teebine pita mäpu pa wääcärepenene, cuta eei bine lui cina sargi mule jewenenisi ten cama. Teepi baborage mäpu ne pa jääpänepesi cäme bau ca, teepi liba lica pagege abmala niya mule bine pui magebi cama cäme bau me atatröngärame. ²³Cane cuta budre me pa yaaglecemepene pui magebi me ingwe äcwiyame biname bine iyeta ätrunga ingle cina piba päpäname, egä cane age säne lui te umle iyeta biname bime yepäyepä ngena atwanena piyepu singi. Cane cirege weeme mule ibi weeme yepäyepä bine daremu ceera. ²⁴Yepä weene poto cina piti nemi Tiyatira je, lui cina lica yaacatepeye peei niyarage abiberäja ne. Weene lica ituge abiberäja lui ne yaainusi Satani me sungabera ge ogä mule ca. Peei name pi cane lica nuuja gwidape täapume jijenininine, ²⁵yepä kokre cama joomlepeye weeme ngena pisi nyene, ngälu cane cire lacnenutepene. ²⁶⁻²⁷Laati te cire yuutrutepi piyepu cäme singi ne cire jaawenepi ngälu ngälugaabe me, cane pui biname ne yepä kokre cirege ceera, cane lui kokre ne ituge acata Babe bau ca. Cane ayana suru pana kokre ne cire yääcärepenene tabe gawe maramara biname bine waadename piyepu sabe waweneme cäme cubuyame bine, epu pana gawe ca wawenäneji disi ne lipu yaatebicusi. ²⁸Cane cuta teebine Guji Wale cirege ceera.

²⁹Weeme liba tablame piti nemi ätecijame, itecijinege, Aceji Seemo te ngena jejenenemige ätrunga maramara ingle bine.’ ”

Mene Sardi Ätrunga Ingle bau me

3 ¹“Yoogärepi Sardi ätrunga ingle me mename seemo bau me egä, ‘Lui me piti nemi Acejiyame me seben seemo, cuta lui me piti nemi seben wale, tabe jüicenige egä: Cane umle gäne iyeta weeme poto cidi me. Biname cina apu jengenemige, egä weene ireclota gemi, yepä weene budre gemi. ²Peei name pi weene arpinäripeye, weeme ngena camu pisi nyene, kokre joomlepeye, cije iyeteta lapesaruge. Cane jepänininine egä weene lui mule bine jewenenemiye, cäme Acejiyame me opo gaabe conocäco lica gemi. ³Peei name pi weene ngena jotwipewe weene ngena ituge abiberäja piyepu ätecija. Pui ne kokre joomlepeye, tatatröngäripeye weeme niya mule cabu ca. Weene liba arpinera cäco, cane peeyeme eromaame pana cire lädepene. Weene umle lica cäme otni padare luci yene.

⁴Yepä nesae cina piti nemi Sardi cewe je, lui cina teeme cäbletääpe bine jugi cäco ewetnenemisi. Teepi cane cama bulubulu cäbletääpe cama cire waatnipesi, ingle teepi miiji gemi peei täapume. ⁵Laati te cire yuutrutepi, tabe apu bulubulu cäbletääpe cirege asigra. Cane lica cirege iisibrea teeme ngii ne pui peba cabu ca, iyeteta ireclota täapume luma

ngii bine ituge oogära. Cäme Babe piyepu teeme mename seemo bime opo gaabe je cane cire yaainepene teebine cäme biname ca.

⁶Weeme liba tablame piti nemi ätecijame, itecijinege, Aceji Seemo te ngena jejenenemige ätrunga maramara ingle bine.’ ”

Mene Piladelpiya Ätrunga Ingle bau me

⁷“Yoogärepi Piladelpiya ätrunga ingle me mename seemo bau me egä, ‘Ai mene lui teeme bau ca gyene, Acejiyame täöpume lui te mara me ituge äbita piyepu lui toraca gyene. Tabe te Daawida me kii ne joomlenige, siige liba jiitnuge, nuuja te äblicäco armi; liba yaarmuge, nuuja te äblicäco iitnana. Tabe apu jiicenige egä: ⁸Cane umle gäne iyeta weeme poto cidid me. Cane umle gäne, egä weeme kokre matikäli gyene, yepä weene cäme abiberäja ne kokre joomleniye, cuta lica naineniye cebine. Cane weeme täöpume gaabe ituge iitnana, nuuja te äblicäco gyene armi. ⁹Itecijinege! Satani me biname peema piti nemi, lui cina lainininusi Israela biname ca, yepä teepi walya waatromininusi, teepi Israela biname lica. Cane pa jaawenemepene teepi weeme bau me otnime kokorare ca äpedname weeme ernge gome, siige teepi umle pa läbitipesi, egä cane singi pisi näne weeme täöpume. ¹⁰Ingle weene kokrerage imyemutinuge mäpu cabu, cane lipu itu jijipene weene wawenname, peei name pi cane cuta piwärimtipene, lui mäpu te pa tädepi iyeta poto ta ai gawecewe biname bine apicetnärame. ¹¹Cane mameta gäne acnenuta. Weene kokre joomlepeye, weeme ngena pisi nyene, piba nuuja te lica cirege uutecra weeme daremu ne. ¹²Laati te cire yuutrutepi, cane cire jaawenepene mutre caage me cäme Acejiyame me iiwäreja mete cabu je, siige tabe licarage abmala pui mete ne. Cane teeme cabu cire yoogärepenene cäme Acejiyame me ngii, cuta piyepu cäme Acejiyame me cewe ngii, Kirece Yerusalema, lui te cire täinepi cabu ca cäme Acejiyame bau ca. Cane cuta cäme kirece ngii ne teeme cabu cire yoogärepenene.

¹³Weeme liba tablame piti nemi ätecijame, itecijinege, Aceji Seemo te ngena jejenenemige ätrunga maramara ingle bine.’ ”

Mene Laodikea Ätrunga Ingle bau me

¹⁴“Yoogärepi Laodikea ätrunga ingle me mename seemo bau me egä, ‘Lui te Acejiyame me mene ne toraca me jewenenige, lui te toracarage jeitnäjenige teebine, piyepu lui sine agednayame iyeta gawecewe gwidape täöpume, Acejiyame lui bine ituge wawenetnäja, tabe apu jiicenige egä: ¹⁵Cane umle gäne iyeta weeme poto cidid me. Weene seemo ireclota cabu toraca budre lica gemi, weene cuta toraca ireclota lica gemi. Oo, cane lipu singi gäne peei nuuja täöpume. ¹⁶Yepä ingle weene ejijejija gemi, peei name pi cane weebibine piyäripene, biname te lipu niiyarage niiye ne yaaclemutuge teeme tage cabu ca. ¹⁷Weene jiiceniye

egä, “Cime iyeta gwidape piti nemi, cine nuuja gwidape täápume singi lica gemi.” Yepä weene opo lica ewatneniye, egä weene lipu niiyarage piiyepu owecumete gemi. Weene dogwe biname lica gemi, yepä weene cuutacuta gemi, irecu määsumäsu gemi. ¹⁸ Peei name pi cane jijenininine golrage aletname căme bau ca naace täápume weene piba toraca dogwe päpăname. Cuta bulubulu căbletăäpe bine jeletnemepeye căme bau ca weeme peei cuutacuta ajiri ne acwabame. Cuta ngăngye bine jeletnemepeye weeme irecu cabu acraname piba weene căngena päpăname. ¹⁹ Cane umle jewenenemine, eblawăjenenemine, cane lui biname bime täápume singi. Peei name pi weene miiji toraca ngenecu cama atarongăripeye weeme niyaniya mule cabu ca. ²⁰ Itecijinege! Cane gaabe gome nămyemutenige, eyăjenine. Laati te nătecijuge căme tagepogogo, siige gaabe jiiitnuge, cane labacitune, teta cama deedei yăărwăjimune, tabe cane cama. ²¹ Laati te cire yuutrutepi, cane cire yaacanepene căme gome adnatame tabe puma cita ca cane cama biname bine waadename epu pana, cane lipu yuutrutujine, siige adnatujine căme Babe gome ten cama biname bine waadename.

²² Weeme liba tablame piti nemi ätecijame, weene itecijinege, Aceji Seemo te ngena jejenenemige ätrunga maramara ingle bine.’ ”

Yoane Cabucewe ne Jepănige

4 ¹ Ai ingwe gaabe ca cane cabucewe je grana ne jepănine iitneji ge. Niinäce tagepogogo cane lui itu nătecijumi, moole ala pana ge, apu najige egä, “Tădi aima cabucewe me! Cane gwidape naawabetnărinine, ingwe gaabe ca lui cina cire lăpletnerăjipesi.” ² Piba taatu Aceji Seemo te cebine nacenanige. Cane cabucewe je babo adnata puupu ne jepănine, lui cabu yepä te adnatăneji enajige. ³ Teeme opo epu toplacmelăjige yaspere piiyepu karneliya kula liiyepu. Pui babo adnata puupu gome cănibăniba te aclitige. Teeme kala epu ge emeraldi kula me liiyepu. ⁴ Poto twentifoo modamoda adnatera puupu cina babo adnata puupu ne jewaclomtisi. Twentifoo modamoda biname pui puupu cabu adnatăreji puga ge. Teepi bulubulu căbletăäpe asigrăreji ge, piiyepu teeme mope cabu puga ge gol ca wawenăneji krauni. ⁵ Babo adnata puupu cabu ca paamlepamle cina toplacmelăjininisi, maadubi te ala sengenige piiyepu babo ala puga ge. Teeme opo gaabe je seben ngale cina ayinisi. Pui lui Acejiyame me seben seemo gemi. ⁶ Teeme opo gaabe je cuta puga ge glaasi malu pana gwidape, lui päpăna taaturage ge.

Babo adnata puupu ne fooa ireclota gwidape cina jewaclomtisi iyeta poto ta. Teeme owe gaabe ca, kaake poto ca iyeta irecu taatu ge. ⁷ Niinäceyame me opo lui layani pana ge; pumacitacayame me opo lui buli pana ge; pumacitacayame me opo biname pana ge; cerăcerăgăăbuyame te epu pana ge warye, lui uujenige. ⁸ Teepi iyeta lui

siks taame cama ge. Teeme iyeta poto ta irecu puga ge, ngalebora ca, kaake poto ca. Teepi iyeta padare, ciye bimu, apu jicemusi egä,

“Epućäco, epucäco, epucäco gyene

Yageyame, kokrerage Acejiyame,

lui tage niinäce gaabe je, lui sine page,

lui te iyeteta pa yaanajepi!”

⁹Iyeta padare fooma ireclota gwidape cina liba yaawepyeräjusi, opo gaabe me yaacitanusi, eso yäacäranusi, lui te iyeteta gyene, babo adnata puupu cabu enajenige, ¹⁰piba twentifoo modamoda biname cina yaatrametnemalemuge teeme opo gaabe je. Teepi teeme krauni bine juuwemusi, yaacranimusi babo adnata puupu opo gaabe je, jicusi egä,

¹¹“Cime Yageyame, cime Acejiyame,

maane miiji gäte biname cina meebine awepyeräjame.

Maane miiji gäte teepi meebine opo gaabe me acitame

piiyepu iicaname egä, ‘Maane kokrerage gäte,’

ingle iyeta gwidape maane te ituge wawenetnäja.

Määme singi ca teepi itu äbitininujisi,

ireclota itu jepänujisi.”

Äclubäneji Peba piiyepu Maamoi

5 ¹Cane äclubäneji peba ne jepänine teeme camu poto ime cabu, babo adnata puupu cabu lui te enajenige. Pui peba cabu neenenipotopoto oogäräneji ge, seben uli ngate ca klaje wawenäneji ge. ²Puma cita ca cane jepänine, Acejiyame me babo kokre mename seemo te baborage tagepogogo ca jicige egä, “Laati te miiji gyene ai ngate bine äyebhengäjame peba ne iitnaname?” ³Yepä nuuja ne lica jepänisi cabu je, gawe je, gawe ngalebora je, lui te miiji gyene peba ne iitnaname ngalebora ireme. ⁴Cane ele nangenige, inge nuuja ne lica jepänisi, lui te miiji gyene pui peba ne iitnaname coo ngalebora ireme. ⁵Puma cita ca twentifoo modamoda biname bime yepä te najige egä, “Ele gone naangenenge! Ire, Layani pisi nyene Yuuda me inge cabu ca, babo biname Daawida me kaakesaare, tabe te ituge uutruta teeme cubuyame bime cabu ca, peei name pi tabe miiji gyene seben ngate bine äyebhengäjame peba ne iitnaname.”

⁶Puma cita ca cane jepänine Maamoi ne aclajuteji babo adnata puupu gome, fooma ireclota gwidape piiyepu twentifoo modamoda biname bime cole cabu. Tabe epu pana ge, egä teebine uja ituge agli. Teeme seben gaale piiyepu seben irecu puga ge. Pui irecu lui Acejiyame me seben seemo gemi, lui cina ätyepäneji gemi gawecewe me iyeta poto ta. ⁷Siige Maamoi te ädige, peba ne ecatiche teeme camu poto ime cabu ca, babo adnata puupu cabu lui te enajenige. ⁸Tabe liba pui peba ne ecatiche, puma cita ca fooma ireclota gwidape cina piiyepu twentifoo modamoda biname cina itrametnemalemige teeme opo

gaabe je. Teeme yepäyepä cina joomläjemisi ala-ala gwidape ngii haapi bine piyepu gol disi bine, lui bora miijimiji lengo gwidape ge uubudera täápume. Pui miiji lengo gwidape lui Acejiyame me binamewale bime irecu ätumuta mene gemi. ⁹Teepi kirece uupera ne etangisi Maamoi täápume apu egä,

“Maane miiji gäte peba ne acatame
teeme ngate bine äyeblogäjame,
ingle naace popi meebine budre me naaglujisi,
siige määme uudi ca sewecnimujite Acejiyame bau me
ingle maramara, mene maramara,
gawe maramara, tääpe maramara biname bine.

¹⁰Maane te jewenimujite teebibine
biname bine waadena biname me
piyepu iiwäreja biname me lenajame
mime Acejiyame täápume kaakesea wawename.
Teepi te cirege gawecewe ne acana.”

¹¹Puma cita ca cane jepänine Acejiyame me mename seemo tomi ne, lui baborage ge. Teepi epu bucurage ge, egä äblicäco acnema. Teepi babo adnata puupu ne jewaclomtisi, cuta fooa ireclota gwidape bine piyepu twentifoo modamoda biname bine jewaclomtemisi. Cane nätecijige, ¹²teepi oräre uupera ne etangisi egä,

“Maamoi lui ne eglujisi,
miiji gyene cine meebine awepyeräjame,
ingle määme conocäco pisi nyene
iyeta gwidape bine waadename.
Määme piti nemi dogwe, umle, kokre,
maane baborage gäte,
määme ngii caburage gyene,
peei name pi cine meebine eso näcärenisi.”

¹³Cane cuta nätecijige iyeta gwidape cina cabu je, gawe cabu je, gawe ngalebora je, niye ngalebora je – iyeta lui cina ireclota cama gemi – teepi apu uupera ne etangisi egä,

“Lui te enajenige babo adnata puupu cabu cuta piyepu Maamoi,
teebibine laawepyeräjesi, ngii babo jaawenesi,
opo gaabe me laacitesi iyeteta.
Teeme kokre iyeteta yaanajege.”

¹⁴Siige fooa ireclota gwidape cina teebibine mene jewecniste-misi, jicisi egä, “Peei lui toraca mene gyene!” Piba modamoda biname cina itrametnemalemige gawe cabu me Maamoi me opo gaabe je teebine awepyeräjame.

Maamoi te Siks Uli Ngate bine Jewalimige

6 ¹Puma cita ca cane jepänine Maamoi te seben ngate cabu ca yepä ne äwäluta piyepu nätecijige fooa ireclota gwidape bime yepä te iicana

maadubi pana tagepogogo ca egä, “Tädi!” ²Cane ire acitine, jepänine, bulubulu cooso te puga ge. Cooso cabu lui te tädige, gagari cama ge, piyepu teebine krauni ecärisi. Siige tabe wälu cäco ädige cerämu cubuyame bine budre me aglecame.

³Maamoi te liba neeneni manu me ngate ne jewälutige, cane nätecijige neeneni manu me ireclota gwidape te icana egä, “Tädi!” ⁴Piba nuuja cooso te tädige, lui ududi ge. Cooso cabu lui te tädige, teebine conocäco ecärisi cubu mule ne acaname gawecewe cabu me piba biname cina teemeteme budre me aglecame. Teebine baborage cubuturikä ecärisi. ⁵Maamoi te liba nesae manu me ngate ne jewälutige, nesae manu me ireclota gwidape te jiicige egä, “Tädi!” Cane ire acitine, jepänine, cäsäcäsä cooso te puga ge. Cooso cabu lui te tädige, teeme ime cabu puga ge skeil. ⁶Pui fooma ireclota gwidape bime cabu ca cane biname pana tagepogogo nätecijige, skeil cama biname ne jejige egä, “Yepä bimu me daremu ca aletna yepä liita wiiti plawa coo piyepu yepä bimu me daremu ca aletna trii liita baali plawa. Yepä maane olibi uli bine piyepu waina seasea bine sabe gone jaawenimute.”

⁷Maamoi te liba fooma manu me ngate ne jewälutige, cane nätecijige fooma manu me ireclota gwidape te icana egä, “Tädi!” ⁸Cane ire acitine, jepänine, mulimuli pana cooso te puga ge. Cooso cabu lui te tädige, teeme ngii Budre, piyepu Aadiri te teebine ingwe ca sicwige. Teebibine kokre ituge ceera gawe me cebocebo biname bime cabu ca nuuja cebo ne acatame, budre me aglecame cubu ca, pita ca, gane ca, drowä girigale gwidape ca.

⁹Maamoi te liba faib manu me ngate ne jewälutige, cane piba jepänine iiwäreja dade ne. Teeme gawe me puga ge eei biname bime cable, lui bine ituge agleca, ingle teepi Acejiyame me Mene wälu cäco ituge iicema. ¹⁰Teepi jiicisi baborage tagepogogo ca egä, “Oo babo kokrerage Yageyame, maane conocäco piyepu toraca gäte! Luma ngälu padare cine cirege lenaja, ngälu maane gawecewe biname bine cire jitranemepi, daremu cire ecäremepi cime agleca name pi?” ¹¹Teeme yepäyepä bine lecaleca bulubulu cäbletääpe ecäranemisi, jejemisi teepi matikäli trämä cerämu lenajame, ngälu pui ngälu ne cire joomlepi lui ituge acita teeme pana Acejiyame me kaakesea bägrä bine budre me aglecame, teebibine lipu ituge agleca.

¹²Puma cita ca cane jepänine Maamoi te siks manu me ngate ne jewälutige. Babo ocneja puga ge. Bimu te cäsä me äbitige, siige apacliyera lica ge; cuta piyepu mabye te uudi pana ududi me äbitige. ¹³Wale cina itrametnemige gawe cabu me, epu pana uli kuu lipu saatrametnemuge, babo buuwe te liba uli ne jaakocnäjuge. ¹⁴Dume te äclubicige, epu pana waaku ne lipu yäclubicusi, siige ämlitige. Iyeta podo piyepu curä cina äyebengäjininisi teeme puupu cabu ca. ¹⁵Maramara gawe mope

biname, teeme ingwe poto ca lui mope biname, cubu mutre biname, dogwe biname, modamoda ngii biname, iyeta aletnäneji biname piyepu iyeta poto biname, teepi ämletnininisi kula waja cabu je coo piyepu modamoda kula uuwa cabu je. ¹⁶Teepi ala abayaninisi modamoda kula cabu me piyepu podo cabu me egä, “Weene nibaletnecineye, nimletnineye eei me irecu cabu ca, lui te babo adnata puupu cabu enajenige piyepu Maamoi me claabe cabu ca! ¹⁷Teeme babo claabe bimu age sena, siige nuuja te äblicäco gyene ireclota lenaja.”

Yepä Hanred Footifoo Tausen Israela Biname

7 ¹Ai mule ingwe gaabe ca cane jepänimine fooa Acejiyame me mename seemo bine aclajuteji gawe me fooa mutre cabu ta. Teepi jiihemisi fooa buuwe bine piba nuuja te lica äpwäjame gawe cabu, malu cabu, glunubora je. ²Cane cuta nuuja mename seemo ne jepänine, bimu acita gome ca lui tädige. Teeme gwidape pisi nyene ireclota Acejiyame me cewecu ne acitame biname bime cabu je. Tabe baborage tagepogogo ca ala abayige pui fooa mename seemo bime bau me, lui bine kokre ituge ceera sabe wawename gawe ne piyepu malu ne. ³Tabe jejemige egä, “Gone sabe wawena gawe ne, malu ne, uli bine, ngälu cine mime Acejiyame me cewecu ne pa yaacitanepesi teeme kaakesea bägrä bime mangace cabu!” ⁴Puma cita ca cebine najisi, luma ngälu biname cina cirege pui cewecu ne acata. Teepi lui yepä hanred footifoo tausen biname gemi Israela biname bime twelb ingle cabu ca.

⁵⁻⁸Teepi twelb tausen biname ge yepäyepä ingle cabu ca:

Yuuda me ingle cabu ca,
 Rubena me ingle cabu ca,
 Gaada me ingle cabu ca,
 Asera me ingle cabu ca,
 Napatali me ingle cabu ca,
 Maanasa me ingle cabu ca,
 Simeona me ingle cabu ca,
 Leebi me ingle cabu ca,
 Isakari me ingle cabu ca,
 Seblona me ingle cabu ca,
 Yoosepa me ingle cabu ca,
 Benjamina me ingle cabu ca.

Baborage Biname Tomi Bulubulu Cäbletääpe cama

⁹Ai mule ingwe gaabe ca cane jepänine baborage biname tomi ne, acnema äblicäco ge. Teepi lui gawe maramara, ingle maramara, tääpe maramara, mene maramara biname ge. Teepi jeclajutäjemige babo adnata puupu opo gaabe je piyepu Maamoi me opo gaabe je. Teepi

lecaleca bulubulu cäbletääpe asigräreji ge, uli laame ime cabu ge teeme gege ne awabudnitame. ¹⁰Teepi baborage tagepogogo ca abayaninisi apu egä,

“Mime Acejiyame, lui te enajenige teeme babo adnata puupu cabu piyepu Maamoi,
teepi te biname bine niya cabu ca birige äsecerera!”

¹¹Iyeta mename seemo cina jeclajutäjimige, babo adnata puupu ne jewaclomtisi, cuta piyepu fooma ireclota gwidape bine piyepu twentifoo modamoda biname bine jewaclomtemisi. Teepi itrametnemalemige babo adnata puupu opo gaabe je Acejiyame ne opo gaabe me acitame, siige jicisi egä,

¹²“Ai lui toraca mene gyene!

Mine miiji iyeta padare cabu mime Acejiyame ne awepyeräja, opo gaabe me acitena, eso ceerana!

Taba baborage gyene, umleyame gyene, kokreyame gyene!

Teeme ngii caburage gyene iyeteta iyeteta!

Ai mene toraca gyene!”

¹³Puma cita ca twentifoo modamoda biname bime yepä te cebine nätemlige, “Maane nää umle gäte, laati bemi ai lecaleca bulubulu cäbletääpe asigräreji biname? Teepi luma cita ca gemi?” ¹⁴Cane jejine egä, “Babo biname, cane umle lica gäne, yepä maane umle gäte.” Taba nawecnistige, najige egä, “Ai lui eei biname gemi, babo mäpu cabu ca lui cina ituge äsi. Teepi teeme cäbletääpe bine itu jicisäjemuji, bulu me itu jenenimuji Maamoi me uudi ca. ¹⁵Peei name pi teepi jeclajutenemige Acejiyame me adnata puupu opo gaabe je, teeme kaakesea ne jenenenisi teeme mete cabu iyeta padare cabu, ciye bimu. Lui te adnatäneji gyene babo adnata puupu cabu, taba ten cama enajenige, teebibine jilyengenemige. ¹⁶Teepi ingwe ca lica pagege loolomecewe coo niyemecewe; bimu te lica atara, coo nuuja nuunu te lica oomlana teebibine, ¹⁷ingle Maamoi lui te jeclajutenige babo adnata puupu opo gaabe je, taba te teebibine pa ire jaatwemepi, pa yaawademepi ireclota niye gome me. Cuta Acejiyame te pagege teeme iyeta elemäcu äciseja.”

Ceräcerägäabuyame Uli Ngate

8 ¹Maamoi te liba seben manu me ngate ne jewälutige, cabucewe te bojäcu enajige cebocebo awa cama. ²Cane puma cita ca jepänimise seben Acejiyame me mename seemo bine aclajuteji Acejiyame me opo gaabe je. Teebibine ecäranemisi seben moole.

³Cuta nuuja mename seemo te tädige, jeclajutige iiwäreja dade gome. Teeme ime cabu puga ge gol disi miijirage lengo gwidape acrana täapume, siige bucurage ecärisi taba alenglecäjame Acejiyame me binamewale bime irecu ätumuta mene cama siige uubuderame gol ca

wawenäneji iiwäreja dade cabu, lui babo adnata puupu gome puga ge. ⁴Tabe jeclajutige Acejiyame me opo gaabe je. Teeme ime cabu ca miijirage lengo kloka cina äsige cabu me Acejiyame me binamewale bime irecu ätumuta mene cama. ⁵Siige tabe pui gol disi ne ecatige, cuta uliobo ne ecatige pui iiwäreja dade cabu ca, ecitige disi cabu me, ijarige gawe me. Piba taatu maadubi te ala sengenige, poto modamoda ala puga ge, paamlepamle cina toplacmeläjninisi, ocneja te cewe ne tedodyeräjige.

Seben Mename Seemo cina Moole bine Jecnäjemisi

⁶Pui seben mename seemo lui bine moole ecäranemisi, teepi amacetnäjininisi äcnäjame. ⁷Niinäceyame te liba teemanu ne jecnäjige, piba aisi ipecu cina, lui uliobo piyepu uudi cama alenglecäjninisi, babo kokre cama gawe me itrametnemige. Uliobo te peema cita ca äpletnutige, siige yepä poto gawe te ayige, neeneni poto gawe cina abmaläsi. Yepä poto gawe me uli cina ayinisi, neeneni poto gawe me abmalininisi. Baace cina ayinisi iyeta poto ta.

⁸Neeneni manu me mename seemo te liba teemanu moole ne jecnäjige, podo pana gwidape lui te uliobo cama ge, piba ajarige malu cabu me, siige yepä poto malu me niye te ateplingtige uudi me, neeneni poto malu me niye cina abmaläsi. ⁹Lui poto malu me niye te uudi me äbitige, iyeta ireclota gwidape bine budre me eglecimige, buto bine cuta sabe jewenimige.

¹⁰Nesae manu me mename seemo te liba teemanu moole ne jecnäjige, baborage wale te piba itramige gawe me. Epu äinige ngale pana, siige yepä poto gawe me baduge bora me piyepu waja bora me abacitanige. Neeneni poto gawe me baduge piyepu waja cina abmalininisi. ¹¹Pui wale me ngii lui Caapo. Pui yepä poto gawe me niye cina caapo me äbitininisi. Bucurage biname cina budre äbitininisi, teepi liba enisi pui niye ne.

¹²Fooa manu me mename seemo te liba teemanu moole ne jecnäjige, cabu je bimu me yepä poto te äplige, neeneni poto cina abmaläsi; mabye me cuta yepä poto te äplige, neeneni poto cina abmaläsi, cuta yepä poto me wale cina äplegicinisi, neeneni poto me wale cina abmalininisi, piba pui poto bimu, mabye, wale apaclyera lica ge. Pui name pi bimu me yepä padare krokeciye ge, neeneni padare apaclyäreji ge; cuta ciye me yepä padare krokeciye ge, neeneni padare apaclyäreji ge.

¹³Puma cita ca cane jepänine yepä warye te tuujananige cabu je. Tabu baborage tagepogogo ca tiicige egä, “Ogi nemi, ogi nemi, ogi nemi, lui cina inajininige gawe cabu. Weene baborage mäpu ne pagege päpäna, cerämu nesae mename seemo cina liba pagege teeme moole bine äcnäja.”

9 ¹Faib manu me mename seemo te liba teemanu moole ne jecnäjige, cane piba jepänine wale ne, lui ituge atrama gawe cabu me. Piiyemrage cupicu puga ge, lui armeji ge. Pui wale ne kii ecärisi pui

cupicu ne iitnaname, ²siige tabe jiitnige. Baborage kloka te tasatige, epu pana budni ne lipu juubudarusi, carbe bine icwabimige piiyepu bimu ne cuta icwabige. ³Pui kloka cabu ca sesi cina täsige gawe cabu me. Teeme kokre puga ge biname bine pita ceerame, epu pana potetagetage te lipu biname ne yäägutuge babo pita cama. ⁴Teebibine jejemisi, “Gone sabe jaawenimuye baace bine, uli bine coo nuuja uutana gwidape bine, yepä pui biname bine taatu sabe jewenemepeye, lui bime mangace cabu lica gyene Acejiyame me cewecu.” ⁵Teebibine jejemisi faib mabye ngalebora biname bine pita mäpu ceerame, yepä lica budre me aglecame. Teeme peei pita te epu pana ge, potetagetage me äguta cabu ca lipu pita ne jääpänusi. ⁶Pui padare cabu biname cina naabe liga budre me cire läbitipesi, yepä teepi budre lica cirege. Teepi babo singi budre me, yepä teepi budre te lica cire joomle-mepi.

⁷Pui sesi cooso pana ge, lui bine cubu täapume yaama-cetnäjimusi. Teeme mope cabu puga ge gol ca wawenäneji krauni pana gwidape, opo lui biname pana ge, ⁸edingäli lecaleca ge, giricu lui layani pana ge. ⁹Teeme dare cabu puga ge epu pana ayana gwidape, cubu cabu lui ca biname cina dare bine jäälyengimusi. Teeme taame puuwämu epu pana ge, bucurage cooso cina lipu kariyota bine yäälädnimusi cubu cabu je. ¹⁰Teeme kiira gaale cama ge potetagetage me liiyepu. Teepi pui gaale ca biname bine sabe jaawenanemusi faib mabye ngalebora, siige teepi pita ne jääpänusi. ¹¹Teeme mope biname yepä mename seemo puga ge. Tabe te ire jetwenige pui piiyemrage cupicu ne. Heberu mene ca teeme ngii lui Abadoni, Griik mene ca lui Apolyoni. Teeme aboclomta lui egä ‘Sabe Wawenayame’.

¹²Yoo siige, yepä mäpu te peega bapirige, piiyeme cerämu neeneni mäpu gegi otnime.

¹³Puma cita ca siks manu me mename seemo te jecnäjige teemanu moole ne. Lui gol ca wawenäneji iiwäreja dade puga ge Acejiyame me opo gaabe je, pui me foom mutre cabu ca cane nätecijige tagepogogo, ¹⁴lui jejige siks manu mename seemo ne egä, “Foom mename seemo bine jiihiremepi, lui cina ätäyäneji gemi Euprates babo baduge gome.” ¹⁵Siige teebibine jiihirimisi puiirage kämäge, mabye, bimu, padare cabu teepi yepä cebo biname bine budre me aglecame, neeneni cebo bine abmaläcemame. ¹⁶Cane nätecijige luma ngälu cubu biname cooso cama puga ge. Pui lui neeneni hanred milyon ge. ¹⁷Wama pana cane cooso bine jepänimine piiyepu teeme papa cabu lui biname ge. Teepi ayana gwidape asigräreji ge teeme dare bine älyengame. Pui älyenga gwidape lui uliobo pana ududi ge, sapiri kula pana sisi ge, cuta piiyepu sulphur pana mulimuli ge. Cooso bime mope layani pana ge. Teeme tage cabu ca täsige uliobo kloka cama piiyepu niyarage lengo gwidape ngii sulphur. ¹⁸Pui nesae gwidape cina: uliobo, kloka piiyepu sulphur, cooso bime tage

cabu ca lui täsige, seglecemisi yepä cebo biname bine, neeneni cebo cina abmalininisi. ¹⁹Pui cooso bime kokre lui tage cabu ca ge piiyepu kiira cabu ca ge. Teeme kiira lui cobyame mope pana ge, siige pui ca biname bine sabe jewenanemisi.

²⁰Lui biname cina budre lica äbitaninisi ai mäpu cabu, teepi lica ätecitininisi ime ca wawenäneji gwidape bine awejename. Teepi camu ewejanemisi niyaniya cable bine, piiyepu gol ca, silba ca, braasi ayana ca, kula ca, uli ca wawenäneji gwidape bine, lui cina äblicäco ge päpäna, äteciya, otnetneja. ²¹Cuta teepi lica tatatrongärininisi biname bine agleca mule cabu ca, mowä mule cabu ca, sargi mule cabu ca, gwidape ero cabu ca.

Acejiyame me Mename Seemo te Yoane ne Peba Ecärige

10 ¹Puma cita ca cane jepänine Acejiyame me nuuja kokre mename seemo te äina je cabucewe ca. Carbe te teebine icwabige cäbletääpe pana. Cänibäniba te aclitige teeme mope gome. Teeme opo epu apaclyäreji cama ge bimu liiyepu, piiyepu teeme ernge neeneni uliobo wädräji liiyepu. ²Teeme ime cabu puga ge matikäli peba, lui te iitneji ge. Tabe teeme camu poto ernge ne malu cabu ecitige, säwäci poto ernge ne doru cabu ecitige, ³siige baborage tagepogogo ca ala abayanige layani me tagepogogo liiyepu. Seben maadubi cina teebine jewecnistisi. ⁴Siige teepi liba ala sengenetne-mige, cane oogärame äbitine, yepä piba taatu cane tagepogogo näteciyige, cabucewe ca lui te najige egä, “Gone yoogärute, seben maadubi cina ngeno me bii jiicisi. Peei lui ogä mene gyene.”

⁵Puma cita ca pui mename seemo cane lui ne jepänine aclajuteji malu cabu piiyepu doru cabu, tabe teeme camu poto ime uutige cabucewe me. ⁶Acejiyame lui te iyeteta gyene, lui te jwenimuji cabucewe, gawecewe, malu piiyepu teeme cabu lui iyeta gwidape, teeme ngii cabu pui mename seemo te jiicige egä, “Siige! Cerämu awagriya lica gyene. ⁷Seben manu me mename seemo te liba teeme moole ne pa jääcnäjepi, Acejiyame piba pa yaapirepi teeme ogä ngene atwana ne, tabe lui ituge jaji teeme kaakesea bägrä bine, lui teeme mename biname gemi.” ⁸Puma cita ca niinäce cane lui tagepogogo näteciyige cabucewe ca, cääri najige egä, “Äte, peba ne ecati lui iitneji gyene pui mename seemo me ime cabu, lui te jeclajutenige malu cabu piiyepu doru cabu.” ⁹Cane siige ädine, jejine matikäli peba ceerame. Tabe najige, “Ecati, erwi! Määme came cabu caapocapo enajenige, yepä maane liba erwenite, määme tage cabu mite taatu, uri liiyepu.” ¹⁰Cane peba ne ecatine teeme ime cabu ca, siige erwine. Cäme tage cabu epu mite enajige uri liiyepu, yepä liba erwine, cäme camuge bora caapocapo ge. ¹¹Puma cita ca cebine najisi egä, “Maane miiji cääri yepä gääbu jejananemepi, ngena cina cirege äbitena gawe maramara,

mene maramara, tääpe maramara biname bime täápume piyepu gawe mope biname bime täápume.”

Neeneni Aitneja Biname

11 ¹Puma cita ca cebine suru näcärisi, atonera suru pana, najisi egä, “Äte, iiwäreja mete ne etoneräji, cuta puma lui iiwäreja dade ne etoneräji. Maane cuta ecnemi lija biname cina irecu ätumutenininisi puma. ²Yepä pui mete caale kaake poto ca lui puupu, pui ne gone yaatoneräjute, ingle pui puupu lui ceereji ge nuuja biname bine, lica Israela biname bine. Teeme ime cabu sine. Teepi te footituu mabye ngalebora sabe cire jaawenepesi Acejiyame täápume lui babo cewe ne mara me ituge wawena. ³Cane cäme neeneni aitneja biname bine cire jäätyepene. Teepi ragre pana cäbletääpe cama cirege. Teepi Acejiyame me Mene cire jaajanemepäsi yepä tausen neeneni hanred siksti bimu ngalebora je.”

⁴Pui neeneni aitneja biname lui neeneni olibi uli gegi piyepu neeneni lampa atacwa dade gegi, lui cina jaaclajutenige ai gawe Yageyame me opo gaabe je. ⁵Laati bemi liba singi sabe wawena teebibine, uliobo te tasatuge teeme tage cabu ca, siige teeme cubuyame bine yaataclomemuge budre me. Yoo, laatibi liba läbitininusi teebibine sabe wawename, peei biname bine pepu birige budre me agleca. ⁶Teeme conocäco pisi nyene ngupe iibaname, siige teepi lui padare cabu Miji Mene cirege jajanena, pui padare cabu ngupe te lica acira. Teeme cuta conocäco pisi nyene waja niiye bine uudi me wawename piyepu maramara mäpu bine ätyepejame gawecewe cabu me, teepi liba singi.

⁷Siige, teepi liba teeme mene jajanena kaakesea ne cire yaapirepäsi, piba drowä gwidape, lui te piyemrage cupicu cabu ca cire tasatepi, ten cama cire larngepi. Tabe teebibine cire läätucärepäsi, siige budre me cire laaglepi. ⁸Teeme budrekaake cina cirege gaabe cabu lenaja pui babo cewe cabu je, teeme Yageyame ne luma jibyecrujisi toto ca baarge uli cabu. Pui babo cewe ne ngene ca agli mene ca Sodoma ca piyepu Aikupito ca einenisi.

⁹Iyeta gawe maramara, mene maramara, ingle maramara, tääpe maramara biname cina cirege teeme budrekaake bine päpänenä nesae piyepu cebocebo bimu cama. Teepi singi lica cirege teebibine gape cabu me acitame. ¹⁰Gawecewe biname cina teeme budre name pi gege cirege. Siige peei name pi teepi cirege giiregire mule wawenetnäja piyepu owecu gwidape cire läcäranipesi, ingle pui neeneni mename biname cina teebibine baborage mäpu me cirege wawena. ¹¹Nesae piyepu cebocebo bimu ingwe gaabe ca Acejiyame te tityepige ireclota buuwemope ne teeme cabu ca, siige tabe abacitanige pui neeneni biname bime trupa ngalebora me, piba teepi abujengtäsi. Iyeta lui cina jääpänsi

teebibine, mage wälu ge. ¹²Puma cita ca pui neeneni mename biname cina äätecijige baborage tagepogogo cabucewe ca iicana egä, “Siclege aima!” Teepi puma cita ca teeme cubuyame bime irewale carbe cabu aalige cabu me. ¹³Puirage padare cabu baborage ocneja puga ge, siige babo cewe yepä poto ne sabe jewenige, nain poto cina abmalininisi. Seben tausen biname bine budre me eglecimige. Lui cina abmalininisi, mage wälu ge, siige Acejiyame lui te enajenige cabucewe je, teebine ewepyeräjisi.

¹⁴Yoo, neeneni me mäpu te peega bapirige. Cerämu pisi nyene yepä.

Seben Manu me Mename Seemo te Teeme Moole ne Jecnäjige

¹⁵Seben manu me mename seemo te liba teeme moole ne jecnäjige, cane piba nätecijige cabucewe ca tagepogogo cina oräre iicana egä, “Mime Yageyame piyepu Keriso, tabe lui ne tityepuji, teepi ituge gawecewe ne acata teeme ime cabu me, siige teepi te pa yaacanepäsi iyeteta.” ¹⁶Piba twentifoo modamoda biname, lui cina teeme adnatera puupu cabu icrajenige Acejiyame me opo gaabe je, teepi owe ca gawe me itrametnemalemige, Acejiyame ne opo gaabe me ecitisi, ¹⁷jiicisi egä,

“Yageyame, babo kokre Acejiyame,

lui sine page, lui tage uja,

cine eso nääcärenisi,

egä maane mäame babo kokre ca ai gawecewe ne ecanenite.

¹⁸Gawe maramara biname cina babo niya me bäbitininisi,

ingle mäame claabe padare te bii tatyaramtige.

Ai lui padare gyene budre biname bine atraname.

Padare te bii tatyaramtige mäame kaakeseayame,

Acejiyame me mename biname bine daremu ceeraname

piyepu iyeta mäame binamewale bine,

lui cina wälu ituge mäame täapume matimati cabu ca ngälu modamoda me.

Padare te bii tatyaramtige sabe waweneme pui bine, lui cina sabe jewenenisi ai gawecewe ne.”

¹⁹Puma cita ca cabucewe je iiwäreja mete te iitnige, siige lui uli boks ngalebora ten cotre bine ewetnenemisi, pui te pajecu me äbitige. Peei mule te liba äbitige, paamlepamle cina toplacme-läjininisi, ala puga ge, maadubi cina ala sengenetnemige, ocneja puga ge piyepu aisi ipecu cina sitrametnemige gawe cabu me.

Magebi piyepu Drowä Gwidape

12 ¹Puma cita ca cane jepänine, mara opo gwidape te lui aboclomtige dume cabu. Pui lui magebi ge. Tabe bimu ca asigräneji ge cäbletääpe täapume piyepu maybe te teeme ernge gawe mage. Teeme

mope cabu lui twelb wale ca wawenäneji krauni puga ge. ²Tabu lui mäpumäpu ge, adnatame äbitige pita ala cama.

³Cuta nuuja mara opo gwidape te aboclomtige dume cabu. Pui lui baborage ududi siible seben mope cama piyepu ten gaale cama. Teeme pui seben mope iyeta krauni cama ge. ⁴Teeme kiira ca tabe yepä poto wale bine jewälidnemige, siige yiisabimige gawe cabu me. Neeneni poto me wale cina abmalininisi. Tabu jeclajutige pui magebi me opo gaabe, adnatame lui te äbitige, naace täapume bägrä te liba aplimla je tabe piba ärmitame. ⁵Siige tabe bägrä ne jirngige, lui te iyeta biname bine cire yaawademepi ayana suru ca. Yepä, bägrä jwuutecrisi, ewepläcitisu Acejiyame bau me teeme adnata puupu cabu me. ⁶Magebi te uucrige daapo taatu cewe cabu me. Acejiyame te puma puupu ne itu semacetnäjumi teeme täapume. Teebine puga ire jotwisi yepä tausen neeneni hanred siksti bimu cama.

⁷Piba cubu puga ge cabucewe je. Acejiyame me babo mename seemo Maikol piyepu teta cama lui mename seemo, teepi arnginisi siible cama. Siible te teeme mename seemo cama liga naabe uutrutame äbitanige, ⁸yepä tabe äblicäco ge, peei name pi teepi äblicäco cabucewe je cerämu lenaja. ⁹Siige pui babo siible ne sjarisi gawe cabu me iyeta teeme mename seemo cama. Tabu pui sasa cobyame gyene, lui ne Diyabolo ca piyepu Satani ca einenisi, ai gawecewe ne lui te ituge angletneja.

¹⁰Piba cane nätecijige baborage tagepogogo cabucewe je iicana egä, “Siige Acejiyame te page byuutrutige!

Tabu teeme kokre ne biiri seboclomtige, egä tabe te biname bine ewadenemige!

Piyepu teeme Keriso te page teeme conocäco ne beboclomtige gawecewe täapume,

ingle Diyabolo te Acejiyame me opo gaabe je cerämu lica enajenige ätrunga biname bine iicetname ciye piyepu bimu cabu je.

Teebine siige gawe me bijarisi.

¹¹Cime ätrunga binamewale cina ituge uutruta teeme bau ca Maamoi me uudi ca piyepu teeme aitneja mene cabu ca.

Teepi singi ge teeme ireclota bine äyemelame budre täapume.

¹²Peei name pi cabucewe piyepu lui cina puma, weene miiji gege! Yepä ogi nemi, lui cina inajininige gawe cabu piyepu malu cabu, inge Diyabolo peeyeme ituge otni.

Tabu babo niyarage gyene,

ingle tabe umle gyene, egä teeme täapume padare matikäli piyeme.”

¹³Siible te liba umle äbitige, egä teebine gawe cabu me bijarisi, tabu gije abacitige pui magebi ne äcwetnename, bägrä ne lui te jirngige.

¹⁴Magebi ne ocärisi babo warye me neeneni taame tabe uujaname teeme puupu cabu me daapo taatu cewe me. Teebine puma pa ire jwaatwepesi nesae piyepu cebocebo kämäge cama, piba teebine siible te äblicäco oomlana. ¹⁵Puma cita ca siible te igi niye ne isatige teeme tage cabu ca magebi me ingwe poto ca teebine acatame. ¹⁶Yepä, gawe te teebine utityäriige, äpälutige, niye ne irmitige, siible me tage bora ca lui te tasatige. ¹⁷Siible te babo niyarage me äbitige magebi täöpume, ädige teeme poto bägrä bime cama cubu me. Teepi iyeta eei gemi, lui cina Acejiyame me Mene ne jäärungusi piyepu Miiji Mene jaajananemusi Yeesu poto cidi me. ¹⁸Siige siible te abmalige malu cabu aclajutame.

Neeneni Drowä Gwidape

13 ¹Cane drowä gwidape ne jepänine malu cabu ca arpata. Tabe ten gaale cama piyepu seben mope cama ge. Teeme gaale iyeta krauni cama ge piyepu iyeta teeme mope cabu ngii puga ge Acejiyame me ngii ne sabe wawename. ²Tabe baborage glunubora pusi pana ge, ngii lepadi. Teeme ime, ernge lui bea pana ge, tage layani me tage pana ge. Siible te teeme kokre ecäriige drowä gwidape ne, cuta ecäriige teeme babo adnata puupu tabe puma cita ca biname bine waadename. ³Drowä gwidape me yepä mope epu pana ge, egä uja ituge budre me agli, yepä pui budre dupe te läsumurepi. Iyeta biname cina mutäcäco äbitininisi, siige teeme singi cabu otnenininisi. ⁴Teepi iyeta siible ne opo gaabe ecitisi, ingle tabe kokre itu yäcärepi drowä gwidape ne. Teepi cuta drowä gwidape ne opo gaabe ecitisi, jicisi egä, “Nuuja te lica gyene drowä gwidape pana. Nuuja te äblicäco teta cama arngi.”

⁵Acejiyame te ire taatu jecitige drowä gwidape ne tabe mope babo äbitame piyepu Acejiyame me ngii ne sabe wawename. Teeme pui drowä gwidape me cuta conocäco puga ge babo biname me lenajame footituu mabye ngalebora. ⁶Siige tabe gije abacitige Acejiyame ne, teeme ngii ne piyepu teeme lenaja puupu ne äingejame cuta eei bine, lui cina cabucewe je icrajinige. ⁷Acejiyame ire taatu jecitige tabe teeme binamewale cama arngime, teebibine apremelame. Cuta teeme conocäco puga ge tabe babo biname me äbitame iyeta maramara ingle, maramara gawe, maramara tääpe piyepu mene maramara biname bime täöpume. ⁸Iyeta biname cina gawecewe cabu teebine opo gaabe me cire yaacitepesi, yepä eei biname lica lui bime ngii ituge oogära ireclota peba cabu agedna me niinäce gaabe je. Pui peba lui Maamoi myene, lui ne eglujisi.

⁹Weeme liba tablame piti nemi, itecijinege ai mene! ¹⁰Lui gemi oomlemame, siige cire joomlemepesi. Lui gemi cubuturikä ca budre me aglecame, siige cubuturikä ca budre me cire yaa-glecemepesi. Ai mäpu mule cina singi Acejiyame me binamewale cina kokre piyepu ätrunga cama aclajutame.

¹¹Cuta cane piba nuuja drowä gwidape ne jepänine, gawe cabu ca lui te tasatige. Teeme neeneni gaale puga ge maamoi pana. Tabe siible pana mene jicemige. ¹²Niinäceyame drowä gwidape te teeme kokre ecäridge pui nuuja ne. Siige tabe teeme irewale giri jicranimige ai gawecewe ne piyepu teeme cabu lenajayame bine niinäce drowä gwidape ne opo gaabe me acitame, lui me niyarage dupe äsumureji ge. ¹³Tabe pui neeneni manu drowä gwidape te modamoda ciitaca mule bine jewenimige; tabe jewenige uliobo ne cabu ca äiname gawe me biname bime irewale. ¹⁴Acejiyame te ire taatu jecitige tabe ciitaca mule bine wawenecame niinäce drowä gwidape me irewale. Ai ciitaca mule ca tabe engletnäjemige iyeta biname bine ai gawecewe cabu. Tabe jejemige niinäce drowä gwidape pana gwidape ne wawename, lui ne niinäce yaaglepesi cubuturikä ca budre me, yepä siige ireclota ge. ¹⁵Acejiyame te ire taatu jecitige neeneni manu drowä gwidape te ireclota buuwemope äpwäclutame pui niinäce drowä gwidape pana gwidape ne siige tabe mene iicemame piyepu budre me aglecame, laati bemi lica teebine opo gaabe me acita. ¹⁶Pui neeneni manu drowä gwidape te giri jicranige iyeta biname bine, matimati biname modamoda biname, dogwe biname owecumete biname, aletnäneji biname coo poto biname, teepi cewecu ne acatame teeme camu poto ime cabu coo mangace cabu. ¹⁷Nuuja te äblicäco gwidape bine aletna coo piyepu aletname waadena, teeme liba pui cewecu lica gyene. Pui cewecu lui niinäce drowä gwidape me ngii gyene coo teeme ngii namba gyene.

¹⁸Maane miiji umle cama ai ne opo awatname. Laasi nyene umle biname, tabe te jäärngege, drowä gwidape me namba ngeni myene. Pui namba lui biname me ngii tääpu myene. Pui lui 666 gyene.

Maamoi piyepu Teeme Binamewale

14 ¹Puma cita ca cane ire acitine, jepänine Maamoi ne aclajuteji Siiyona podo cabu. Ten cama puga ge yepä hanred footifoo tausen biname, laati bime mangace cabu oogäräneji ge Maamoi me ngii piyepu teeme Babe me ngii. ²Cane cabucewe ca tagepogogo nätecijige epu pana niye te lipu podo cabu ca babo ala cama täcwäjuge piyepu cuta babo maadubi me ala liiyepu. Pui tagepogogo cuta epu pana ge, biname cina lipu haapi bine jäänäjimusi. ³Pui yepä hanred footifoo tausen biname cina jeclajutemige babo adnata puupu piyepu foa ireclota gwidape piyepu twentifoo modamoda biname bime opo gaabe je, siige kirece uupera ne etangisi puma. Nuuja te ibibi lica ge peei uupera ne abiberäjame, yepä pui yepä hanred footifoo tausen biname lui cina Keriso me uudi ca aletnäneji gemi gawecewe cabu ca. ⁴Teepi lui eei biname gemi, lui cina cogacoga mule umle cäco, ingle teepi camu tääpe cama gemi. Teepi Maamoi ne ingwe icwenisi, tabe liiyeme

läduge. Teebibine ituge aletna gawecewe biname bime cabu ca. Teepi lui Acejiyame me piyepu Maamoi me binamewale gemi. Teepi epu pana gemi ire acita cabu niinäceyame kuu lui yääcärusi Acejiyame ne. ⁵Teeme tage cabu ca nuuja walya mene te lica ituge asata, coo nuuja niya mule ne lica ituge päpäna teeme cabu.

Nesae Acejiyame me Mename Seemo cina Mene Jiicemisi

⁶Puma cita ca cane jepänine yepä mename seemo te cabu je uujana. Miiji Mene lui iyeteta gyene, tabe pui ne ecenanige iyeta biname bime bau me gawecewe cabu, inge maramara, mene maramara, tääpe maramara, gawe maramara biname bime bau me. ⁷Tabe baborage tagepogogo ca jiicige egä, “Acejiyame tääpume miiji wälu, teebine miiji awepyeräja, inge padare te bii tatyaramtige tabe biname bine atraname. Opo gaabe me eciteye, lui te jewenimuji cabucewe ne, gawecewe ne, malu ne, waja bine.”

⁸Teeme ingwe gaabe ca nuuja mename seemo te tädige, jiicige egä, “Siige, tabe bitramige! Babo cewe Babloniya te bitramige! Teeme sargi mule^d cina sabe jaawenemepesi iyeta gawe maramara biname bine. Teeme pui sargi mule lui kokre waina niye pana ge, siige tabe biname bine jaawenemepi pui nanime.”

⁹Pui neeneni mename seemo bime ingwe gaabe ca nuuja te cuta tädige. Tabe jiicige baborage tagepogogo ca egä, “Laati te liba opo gaabe me yaacituge drowä gwidape ne coo teeme pana wawenäneji gwidape ne, coo liba ime cabu coo mangace cabu teeme cewecu ne yaacatuge, ¹⁰tabe te miiji Acejiyame me claabe waina niye ne nani. Ai lui wainarage niye ge, Acejiyame me claabe ge, tabe lui ne epadurige kaapo cabu me. Apu biname bine cirege ädnäja uliobo wädräji cabu piyepu niyarage lengo gwidape ngii sulfur wädräji cabu Acejiyame me mename seemo bime piyepu Maamoi me opo gaabe je. ¹¹Pui uliobo lui ätuma cäco gyene. Teeme kloka cina iyeteta täseninini cabu me. Laatibi drowä gwidape ne coo teeme pana wawenäneji gwidape ne opo gaabe me yaacitusi, coo laatibi teeme ngii ne yaacatanusi mangace cabu coo piyepu ime cabu, teepi ciye bimü diibe oocana lica cirege pui uliobo cabu ca. ¹²Acejiyame me binamewale cina, laatibi teeme mene yäatecijemuge piyepu laati bemi toraca Yeesu tääpume, teepi gone onya te agli pui drowä gwidape me gaabe cabu otnetnejame.”

¹³Puma cita ca cane näteciijige cabucewe ca tagepogogo te iicana egä, “Maane apu yoogäri egä: Gege gemi pui biname cina ama cita ca ngälu

^d 14:8 sargi mule: Ai lui toraca sargi mule lica gyene. Biname cina uuje bine jäätrungemepesi, lica Acejiyame ne. Peei lui epu pana gyene, egä teepi sargi mule ne jaawenemepesi.

Yageyame me kaakesea cabu lui cina budre ne cire jääpānanepesi.” Acejiyame me Seemo te jewecnistige teebine egä, “Toraca mene gyene! Teepi pagege ngene oocana teeme mäpu kaakesea cabu ca, ingle mene te teeme kaakesea poto cidi me ten cama ädenige.”

Gawecewe me Ire Acita Padare

¹⁴Puma cita ca cane ire acitine, bulubulu carbe ne jepänine. Pui carbe cabu puga ge adnatāneji biname pana gwidape. Teeme mope cabu puga ge gol ca wawenāneji krauni piiyepu ime cabu girirage turikä calwacupi ne ärucname. ¹⁵Iiwāreja mete cabu ca cuta nuuja mename seemo te tasatige, baborage tagepogogo ca ala abayige pui gwidape bau me, carbe cabu lui te enajige egä, “Maane gije abaciti määme turikä ca kuu bine alacname, ingle ärucna padare te bii tatyaramtige. Gawecewe te ngade bewangige ärucna täapume.” ¹⁶Siige lui te adnatāneji enajige carbe cabu, teeme turikä ne sjarige gawe cabu me, siige iyeta ngade bine irucnimige.

¹⁷Iiwāreja mete cabu ca tasatige nuuja mename seemo te. Tabe cuta girirage turikä cama ge. ¹⁸Iiwāreja mete cabu iiwāreja dade gome ca cuta nuuja mename seemo te tasatige, lui te uliobo ne ire jaatwuge. Tabe oräre ala abayige pui mename seemo bau me, lui me ime cabu girirage turikä puga ge. Tabe apu jicige egä, “Määme turikä ca jelacnimi waina kuu bine, ingle ngade bewangetnemige gawecewe me calwacupi cabu.” ¹⁹Siige pui mename seemo te teeme turikä ne sjarige gawe me, jelacnimige waina kuu bine, siige yisabimige kula cupicu bora me ämungejame. Ai lui Acejiyame me daremu gyene niiya mule biname bime täapume. ²⁰Waina kuu bine jimungājemisi kula cupicu ngalebora je babo cewe kaakepoto cidi ca, siige uudi te tasatige pui ämungeja puupu cabu ca igi niye pana, lui niye yepä piiyepu cebocebo miita uugle ge piiyepu trii hanred kilomiita leca ge.

Seben Acejiyame me Mename Seemo cina Lui Mäpu bine Tityepemisi

15 ¹Piba cane jepänine mara opo gwidape ne cabucewe je, cälu te äti pana baborage gwidape. Pui lui seben mename seemo ge seben mäpu mule cama. Pui lui ceräcerägäabu mäpu mule gemi, ingle teepi Acejiyame me claabe ne pa yaapirepesi.

²Puma cita ca cane jepänine gwidape ne, lui glaasi malu pana ge, uliobo cama alengläcitāneji ge. Cane cuta jepänimine lui cina ituge uutruta drowä gwidape cabu ca, teeme pana wawenāneji gwidape cabu ca piiyepu teeme ngii namba cabu ca. Teepi glaasi pana malu gome jeclajutemige, haapi bine joomlemisi, Acejiyame lui ecāranemige. ³Siige teepi etangenisi Acejiyame me kaakesea biname Moose piiyepu Maamoi, teeme uupera ne apu egä,

“Yageyame, kokrerage Acejiyame,

maane ngena jaawenute, baborage piiyepu miijirage gyene!
 Gawe maramara biname bime Mopeyame,
 määme mule lipu conocäco piiyepu toraca gemi!
 4 Yageyame, iyeta biname cina wälu gemi määme tääpume
 piiyepu määme ngii ne ewepyeräjenisi,
 ingle maane taatu gäte epucäco.
 Iyeta gawe maramara biname cina cirege otni
 meebine opo gaabe me acitame,
 ingle teepi määme conocäco atrana ne ituge päpäna.”

5 Ai ingwe gaabe ca cane jepänine cabucewe je lui iiwäreja mete
 te iitneji ge. Pui mete cabu puga ge cäbletääpe ca wawenäneji mete,
 Acejiyame luma enajenige. 6 Iiwäreja mete cabu ca pui seben mename
 seemo cina täsige, lui bime mäpu mule puga ge. Teepi bulubulu
 cäbletääpe asigräreji ge, lui jugi cäco piiyepu oplacmeläja cama. Teepi
 gol seea ca ätäyäneji ge dare cabu. 7 Fooa ireclota gwidape bime yepä
 te ecäranemige teeme yepäyepä bine gol disi. Acejiyame lui te iyeteta
 gyene, teeme claabe ca apanäneji ge pui disi cina. 8 Acejiyame me kokre
 piiyepu apaclyera iiwäreja mete ne epu pana icwabige, kloka te lipu mete
 ne yaacwabuge. Nuuja te äblicäco ge piiyeme abacita, ngälu pui seben
 mename seemo bime mäpu cina liba pa lapiripesi.

Seben Ceräcerägäabu Mäpu Mule

16 1 Puma cita ca cane näteciijige baborage tagepogogo iiwäreja mete
 cabu ca, lui jejemige pui seben mename seemo bine egä, “Äte,
 ecebmäläjemeye gawe cabu me Acejiyame me claabe cama lui seben
 disi gemi!” 2 Piba niinäce manu mename seemo te ädige, ecebmalige
 teemanu disi ne gawe cabu me, siige lui cina drowä gwidape me cewecu
 ne itu yaacatesepesi cuta lui cina teeme pana wawenäneji gwidape ne
 itu opo gaabe me yaacitanepesi, teepi mage niiyarage pita droobo bine
 jepänanemisi.

3 Puma cita ca neeneni manu mename seemo te teemanu disi ne
 ecebmalige malu cabu me. Niiye te epu pana äbitige budre biname me
 uudi liiyepu, siige iyeta ireclota gwidape cina budre äbitininisi puma.

4 Cuta nesae manu mename seemo te teemanu disi ne ecebmali-
 lige baduge bora me piiyepu waja bora me, siige niiye cina uudi me
 ateplengäjininisi. 5 Cane näteciijige niiye bine lui mename seemo te ire
 jetwemenige, jiicige egä,

“Oo, maane epucäco Acejiyame gäte,
 maane lui tage uja piiyepu lui säte page!
 Määme atrana lui conocäco gyene.

6 Teepi yaaglecemepesi määme binamewale bine
 piiyepu määme menameyame bine,

siige maane becärimite uudi teepi nanime.

Teepi teeme niiya mule daremu becatisi.”

⁷Puma cita ca cane nätecijige iiwäreja dade gome ca tagepogogo egä, “Yageyame, kokrerage Acejiyame, mäame atrana lui toraca gyene piyepu conocäco gyene.”

⁸Puma cita ca fooma manu mename seemo te teeme disi ne ecebmalige bimu cabu me, siige bimu te baborage nuunu me äbitige, biname bine ebemige teeme nuunu te. ⁹Biname bine niiyaniya ebemige, yepä teepi Acejiyame me ngii ne sabe jewenanisi, lui me ime cabu sine ai mäpu bine ätyepejame. Teepi singi lica teeme niiya mule cabu ca atamongärame piyepu Acejiyame me ngii ne awepyeräjame.

¹⁰Puma cita ca faib manu mename seemo te teeme disi ne ecebmalige drowä gwidape me babo adnata puupu cabu me. Krokeciye te icwabige tabe lui gawe ne ecanige. Biname cina wätä ägutaninisi pita name pi.

¹¹Siige teepi caburage Acejiyame me ngii ne sabe jewenanisi teeme droobo piyepu pita name pi, yepä teepi teeme niiyaniya mule cabu ca lica atamongärininisi.

¹²Puma cita ca siks manu mename seemo te teeme disi ne ecebmalige Euprates baborage baduge cabu me. Baduge te yuuri-cnige, gaabe me äbitige naace täapume gawe mope biname cina otnime bimu acita gome ca. ¹³Piba cane nesae niyarage cable bine jepänimine. Teepi poogä pana ge. Teeme yepä te siible me tage bora ca tasatige, nuuja te drowä gwidape me tage bora ca tasatige, nuuja te walya mename biname^e me tage bora ca tasatige. ¹⁴Teepi niiyaniya seemo gämi, lui cina ciitaca mule bine jewenenemisi. Teepi cirege otnetneja gawecewe cabu ta maramara gawe mope biname bine abasecretname yepä gome me teepi cubu iicaname kokrerage Acejiyame me babo bimu cabu.

¹⁵“Itecijinege, cane eromaame pana ädenine! Gege gyene pui biname, lui te ireclota enajenige, teeme cäbletääpe bine cängenarage ire jetwemenige, piba tabe cuutacuta lica cire waatne-pi, siige biname bime sobe cabu tabe ajiri lica cirege.”

¹⁶Puma cita ca pui seemo cina jebasecretnimisi gawe maramara mope biname bine puupu cabu me, Heberu mene ca lui puupu ne einenisi Armagedona ca.

¹⁷Siige seven manu mename seemo te teeme disi ne ecebmalige buuwemope cabu me. Iiwäreja mete cabu babo adnata puupu cabu ca baborage tagepogogo te jicige egä, “Siige, bapirige!” ¹⁸Paamlepamle cina toplacmeläjininisi, babo ala puga ge, maadubi cina ala sengenetnemige

^e 16:13 Fwalya mename biname: Ama cita ca ngälu neeneni me drowä gwidape lui te tasatapi gawe cabu ca, pui ne einenisi walya mename biname ca. Tabe niinäce drowä gwidape me ngii cabu mene jicemuge biname bine conocono gaabe cabu me waadename.

piiyepu baborage ocneja puga ge. Niinäce pepu baborage ocneja ne lica ituge pöpäna agedna cabu ca ngälu ai padare cabu. ¹⁹Babo cewe te äplige nesae cebocebo me, piiyepu cuta maramara gawe cabu ta modamoda cewe cina sabe äbitininisi. Acejiyame te ngene lica jitrimalige babo cewe Babloniya poto cidi me, siige tabe jevenige waina niye nanime kaapo cabu ca. Pui waina niye lui teeme Acejiyame me claabe ge. ²⁰Iyeta curä cina apeseräjininisi, iyeta podo cina baa liiyeme äbitininisi. ²¹Modamoda aisi ipecu cina sitrametnemige cabu ca biname bime papa cabu me. Teeme yepäyepä bime mäpu lui footifaib kilo ge. Yepä biname cina Acejiyame me ngii ne sabe jevenisi ai mäpu miji pi, ingle mage niiyarage ge.

Babo Sargi Magebi piiyepu Drowä Gwidape

17 ¹Disi cama lui seben mename seemo, teeme yepä te tädige cäme bau me, najige egä, “Tädi, cane naawabenine, babo sargi magebi ne lipulipu cirege daremu ceera, pui babo cewe ne lui bucurage niye gome ituge raranga. ²Gawe maramara mope biname cina ten cama sargi mule ituge wawena, piiyepu biname cina sice buduma pana me ituge äbita teeme sargi mule waina niye nani cabu ca.”

³Puma cita ca Aceji Seemo te nacenanige cebine, mename seemo te nacanige biname cäco cewe cabu me. Puma cane jopänine magebi ne adnatäneji ge ududi drowä gwidape papa cabu. Tabe lui seben mope cama ge piiyepu ten gaale cama ge. Teeme iyeta tääpe cabu niiyarage ngii oogäräneji ge Acejiyame ne sabe wawename. ⁴Magebi te ududi piiyepu ciriyäciriyä cäbletääpe asigräneji ge, acwabäneji ge gol ca wawenäneji abasogära gwidape ca, oplacmeläja kula ca piiyepu kusa ca. Teeme ime cabu gol kaapo puga ge, lui apanäneji ge teeme jugijugi mule ca piiyepu sargi mule ca. ⁵Teeme mangace cabu oogäräneji ge ngii, lui me aboclomta ogä gyene. Apu oogäräneji gyene,

BABO CEWE BABLONIYA, LUI INGLE GYENE
IYETA JUGIJUGI PIYEPU SARGI MULE TÄÄPUME
AI GAWECEWE CABU.

⁶Cane jopänine, egä tabe sice buduma pana gwene Acejiyame me binamewale bime uudi nani cabu ca piiyepu eei bime uudi nani cabu ca, lui bine ituge budre me agleca Yeesu cabu ätrunga miji pi.

Cane liba jopänine teebine, cane mage mutäcäco äbitine. ⁷Pui mename seemo te cebine nätemlige egä, “Maane ngeno me mutäcäco bäbitite? Cane naajenine, ai magebi lui ngena tääpume mwene, piiyepu cane naajenine, pui seben mope cama ten gaale cama drowä gwidape lui ngeno myene, magebi lui me papa cabu onajenige. ⁸Maane lui drowä gwidape ne niinäce jääpänepete, lui uja yaanajepi, siige page lica gyene, tabe mameta gyene cuta cääri asata piyemrage cupicu cabu ca, yepä sabe cire läbitepi. Ai

gawecewe cabu lenajayame lui bime ngii lica ituge oogära ireclota peba cabu, Acejiyame te luma ngii itu yoogärimuji agedna me niinäce gaabe ca, teepi cirege cälu te äti liba cire jääpänepesi ai drowä gwidape ne, ingle tabe uja yaanajepi, siige page lica gyene, yepä cuta cire tacnepi.

⁹Umle biname lete nemi, teepi te ai mule ne ngene ca aglime. Drowä gwidape me seben mope lui seben podo gemi, magebi te lui papa cabu onajenige. Teepi cuta seben gawe mope biname gemi. ¹⁰Faib cina itu itrametnemuji, yepä te pisi nyene, yepä te camu gyene otni. Tabe liba cire tädepi, tabe matikäli padare taatu cire yaanajepi. ¹¹Cuta pui drowä gwidape lui te uja yaanajepi, siige page lica gyene, liba cire tacnenutepi, tabe eit manu babo biname me cire yaanajepi. Tabe cuta peese nyene pui seben mope biname bime yepä, siige tabe budre gome me cire lädepi.

¹²Maane lui ten gaale bine jepänimite, teepi lui ten gawe mope biname gemi, lui cina camu gemi mope biname me äbita. Teepi liba cire läbitipesi mope biname me, teepi pui drowä gwidape cama gigri matikäli taatu padare cabu biname bine cire yaawadepesi. ¹³Teepi yepä ngene atwana cama cirege, siige drowä gwidape ne teeme kokre cire yääcärepesi.

¹⁴Teepi cire larngipesi Maamoi cama, yepä Maamoi teeme binamewale cama pa yaapremalemepi teebibine, ingle tabe iyeta yageyame bime Yageyame gyene piyepu iyeta mopeyame bime Mopeyame gyene. Teeme binamewale eei gemi, Acejiyame lui bine ala ituge asogleca piyepu äjäcra. Teepi siige toraca gemi teeme täöpume.”

¹⁵Mename seemo te cuta apu cebine najige egä, “Maane lui niye bine jepänimite, sargi magebi te lui gome onajenige, teepi lui gawe maramara, ingle maramara, tääpe maramara, mene maramara biname bime tääpu memi. ¹⁶Maane lui ten gaale bine jepänimite piyepu lui drowä gwidape ne jepänite, teepi pui sargi magebi ne cire jwäägyepesi. Teepi teeme iyeta gwidape bine cire yaawademepesi, cire jwiirecemepesi siige cuutacuta cire waabma-lepesi. Teepi teeme mäju bine cire yäärngäjemepesi, siige uliobo cabu cire waaceratepesi. ¹⁷Pui ten gawe mope biname cina cirege ai bine wawenetnäja, ingle Acejiyame te cire jaawenemepi teepi wawename, tabe ngena täöpume singi. Siige teepi yepä ngene atwana cama teeme kokre drowä gwidape ne cire yääcärepesi. Teepi drowä gwidape ne cire jättecijepesi, ngälu Acejiyame me mene ibi cire läbitipesi. ¹⁸Lui magebi ne jopänite tabe lui babo cewe tääpu mwene, luma cita ca ire jetwenenemisi iyeta gawe maramara mope biname bine.”

Babo Cewe Babloniya Itramige

18 ¹Ai mule ingwe gaabe ca cane piba jepänine nuuja mename seemo ne, lui te cabu ca täinige. Tabe babo kokre cama ge piyepu teeme apaclyera te gawecewe ne epaclyäriige. ²Tabe babo tagepogogo ca ala abayanige egä,

“Siige tabe bitramige! Babo cewe Babloniya bitramige!
Tabe bäbitige jugijugi piiyepu niyaniya cable bime lenaja puupu me.
Cibu cäco niyarage ele cina puma teeme mete bine bii
berangäjemisi.

³ Iyeta gawe maramara biname cina teeme waina niye ne senumesi,
teeme sargi mule me kokre waina niye ne.

Gawe maramara mope biname cina ten cama sargi mule yaacnepesi
piiyepe gawecewe me iyeta aletnaletna biname cina teeme bau ca
bucurage rarekaake bine jääpänanemepesi,
ingle tabe singi teeme bau ca gwidape aletname
teeme lijaliija singi bine ngene aglime.”

⁴ Puma cita ca cane cuta nuuja tagepogogo cabucewe ca nätecijige,
lui jiiçige egä, “Täsineye cäme binamewale, täsineye peei cewe cabu ca.
Gone yääbäcnuye teeme niya mule cabu me, piba weene ten cama yepä
niya daremu ne lica cirege päpäna. ⁵ Teeme niya mule epu bucurage
gemi, egä bii jegeletnemige cabucewe me, siige Acejiyame te ngene bii
jotwige teeme niyarage mule täapume. ⁶ Pepu jewenepeye teebine, tabe
lipu weebibine itu jiwenipi. Tabe ngena ituge wawena weeme täapume,
weene cuta neeneni me daremu ewecnistepeye. Jengärepeye teeme kaapo
ne neeneni gääbu kokre waina niye ca, tabe lui waina niye weebibine
itu icäripi. ⁷ Puma ngälu mäpu piiyepu ele ecärepeye, tabe luma ngälu
lawepyeräjepi piiyepu gwidape papa cabu yaanajepi. Tabe teemämu apu
jiicanenige, ‘Cane age säne babo mope magebi. Cane nuuja cuubla lica
gäne; cane nuuja singi lica gäne ele me.’ ⁸ Peei name pi yepä bimu cabu
mäpu biijabija cina teebine cire jaabale-tnecepesi, naace pita, ngenecu
mäpu, gane. Teebine uliobo cabu cirege uubudera, ingle Yageyame,
Acejiyame, lui te teebine cire jaatranepi, tabe babo kokreyame gyene.”

⁹ Siige gawe mope biname lui cina ten cama sargi mule yaacne-musi
piiyepe teeme singisingi cabu me yääbäcnusi, teepi ele cire yääwäyepesi
liba cire jääpänepesi uliobo kloka ne, teebine lui te cire yaabenepi.
¹⁰ Teepi cudecewe je cire yäämyemutemepi, ingle teepi mage wälu cirege
teeme mäpu name pi. Teepi cire jiiçepesi egä, “Oo babo cewe Babloniya,
babo kokreyame cewe, lipu niyarage gyene mäame täapume! Maane
watatarage atrana ne bii jepänite.”

¹¹ Ai gawe cabu gwidape bine aletname lui biname cina yaawadimusi,
teepi cuta ele cire yääwäyepesi teebine, ingle ingwe ca laati te teeme
bau ca gwidape bine cire jaaletnemepi: ¹² teeme gol, silba, oplacmeläja
kula piiyepu kusa; miijimiji opo bulubulu cäbletääpe, silk cäbletääpe
piiyepe cäbletääpe lui ududi piiyepu ciriyäciriyä kala cama; maramara
uli miijimiji lengo cama, maramara gwidape lui bine wawenäneji gemi
elepent me giricu ca, miijimiji uli ca, braasi ayana ca, ayana ca, bulubulu
kula ca ngii maabolo; ¹³ piiyepu maramara gwidape lui cina mite

yääcärusi deedei ne, miijimiji lengo kloka cama lui gwidape, opo piyepu edingäli agana miijimiji lengo gwidape; waina niye, oil, bulu, wiiti kuu; kau, maamoi, cooso piyepu kariyota, cooso cina lui bine yäälädñajemusi. Teepi cuta aletnäneji biname bine yaawadimusi aletname cuta piyepu biname bime ireclota bine. ¹⁴Aletnaletna biname cina jejisi egä, “Maane lui miijimiji gwidape täápume babo singi naanajanumi, siige lica gemi. Määme iyeta dogwe piyepu anglangla gwidape cina niya bäbitininisi, ingwe ca lica cirege päpäna.”

¹⁵Yoo, lui biname cina pui babo cewe cabu me gwidape bine yaawadanemepesi aletname, puma cita ca rarekaake jääpänanemepesi, teepi cudecewe je cire yäämyemutemepi, wälu cama ire cirege teeme mäpu täápume. Teepi ele cire yääwäyepesi, ¹⁶cire jiicepesi egä, “Oo baborage cewe, lipu niyarage gyene teeme täápume! Tabe lasigruge miijirage opo bulubulu cäbletääpe ca, ududi piyepu ciryäciryä kala cama cäbletääpe ca; cuta labasogärüge gol ca wawenäneji gwidape ca, oplacmeläja kula ca piyepu kusa ca. ¹⁷Siige, watatarage teeme bucurage gwidape cina niya bäbitininisi.”

Siige iyeta buto waapo awadena biname, buto cabu kaakesea biname, buto cabu otnetneja biname piyepu malu cabu lijaliya kaakesea biname gemi, teepi iyeta cudecewe je cire yäämyemutemepi. ¹⁸Siige liba jepänisi teeme kloka ne cabu me agela, jiicisi egä, “Oo, nuuja cewe lica gyene ai cewe pana!” ¹⁹Teepi uubli ca aganininisi, ele ewäyisi, jiicisi egä, “Lipu niyarage gyene ai baborage cewe täápume! Teeme bau ca iyeta lijaliya buto yageyame cina teeme rarekaake bine jääpänanemusi. Siige watatarage iyeta teeme gwidape cina niya bäbitininisi.”

²⁰Cabucewe, maane miiji gege, inge pui babo cewe te lipu niya ne bii jepänige! Acejiyame me binamewale, weene miiji gege; Keriso me ätyepäneji biname piyepu Acejiyame me mename biname weene cuta miiji gege, inge Acejiyame te niya daremu becäridge teebine, naace name pi tabe lipu weebibine jiwenipi.

²¹Puma cita ca yepä kokre mename seemo te babo kula ne ecatige, ijarige malu cabu me, jiicige egä, “Babo cewe Babloniya ne apu cirege gawe me ajara, siige ingwe ca lica cirege päpäna. ²²Ingwe ca lica cirege määme gaabe cabu ätecija haapi ala ne, nuuja uupera ne, gogogo ala ne, moole ala ne. Biname cina lui maramara kaakesea bine jaawenimusi, teebibine ingwe ca lica cirege määme cabu päpäna. Deedei gädñäja guugla ingwe ca lica cirege ätecija määme cabu. ²³piyepu lampa ngale ne ingwe ca lica cirege päpäna määme cabu, cuta ciwelooloyame bime atejäclmuta gege ne ingwe ca lica cire jääpänepesi määme cabu. Apu cirege äbita, inge määme aletnaletna biname, lui niinäce gaabe ge ai gawecewe cabu, piyepu määme mowä piyepu piiseba mule biname cina gawe maramara biname bine itu yaangletnäjemepesi. ²⁴Määme gaabe

cabu cuta ituge apira Acejiyame me mename biname bime uudi piyepu cuta teeme poto binamewale bime uudi, cuta iyeta biname bime uudi, lui bine ituge agleca ai gawecewe cabu.”

19 ¹Ai ingwe gaabe ca cane nätecijige bucurage biname cina iicana pana tagepogogo cabucewe ca, lui jicige egä,

“Acejiyame ne ewepyeräjeje!

Ireclota, iyeta miiji piyepu kokre mime Acejiyame memi,

²ingle teeme atrana lui conocäco piyepu toraca gyene.

Taba jutranige babo sargi magebi ne,

lui ai gawecewe ne ire jaarmetnanuge teeme sargi mule ca.

Acejiyame te mäpu daremu bii bocäriige;

ingle tabe teeme kaakesea bägrä bine budre me itu

yaaglecanemepi.”

³Teepi cuta cääri abayaninisi egä, “Acejiyame ne ewepyeräjeje! Babo cewe me kloka te iyeteta cire jaagelepi cabu me!” ⁴Puma cita ca twentifoo modamoda biname piyepu fooa ireclota gwidape cina itrametnemalige gawe cabu me, Acejiyame ne opo gaabe me ecitisi, babo adnata puupu cabu lui te enajenige. Teepi jicisi egä, “Toraca, Acejiyame ne ewepyeräjeje!”

Maamoi me Atejäclmuta Soriyomu

⁵Piba cane nätecijige tagepogogo te babo adnata puupu gome ca jicige egä, “Iyeta Acejiyame me kaakesea bägrä, lui cina wälu gemi teeme täápume matimati cabu ca ngälu modamoda, weene mime Acejiyame ne ewepyeräjeje!”

⁶Siige puma cita ca cane nätecijige bucurage biname cina iicana pana tagepogogo, epu pana niye te lipu babo ala cama täcwäjicuge podo cabu ca, cuta maadubi ala pana ge. Teepi apu jicisi egä,

“Acejiyame ne ewepyeräjeje!

Yageyame, mime kokrerage Acejiyame,

tabe sine page Mopeyame!

⁷Mine miiji ngenecu miiji piyepu gege ninajinege!

Mine teeme ngii ne yaawepyeräjesi,

ingle Maamoi me atejäclmuta padare te bii tatyaramtige.

Teeme ngulebägrä te amacetnäjäneji gwene teeme täápume.

⁸Tebine ituge jugi cäco bulubulu cäbletääpe ceera

tabe asigrame.”

Ai bulubulu cäbletääpe lui Acejiyame me binamewale bime conocäco mule gemi.

⁹Puma cita ca mename seemo te cebine najige egä, “Maane yoogäri egä: gege gemi, lui cina ala asogläcneji gemi Maamoi me atejäclmuta soriyomu täápume.” Cuta tabe jicige egä, “Ai lui Acejiyame me toraca mene gyene.”

¹⁰Cane teeme ernge gawe me natramige teebine opo gaabe me acitame, yepä tabe najige egä, “Peei ne gone jaawenute! Cane cuta Acejiyame me kaakesea bägrä gäne maane liiyepu cuta määme poto ätrunga binamewale cina liiyepu, iyeta lui cina joomlenisi toraca mene ne, Yeesu lui ne ituge awabudnita. Maane Acejiyame ne opo gaabe me eciti!”

Yeesu lui toraca mene ne ituge awabudnita, peese nyene lui te Acejiyame me mename biname bine ngene atwana yääcäranemuge.

Biname Lui te Bulubulu Cooso cabu Tädige

¹¹Puma cita ca cane jepänine cabucewe te itneji ge, cuta bulubulu cooso ne jepänine puma. Cooso cabu lui te tädige, teeme ngii lui Toraca piyepu Conocäco. Teeme atrana piyepu cubu iicana lui conocäco gyene. ¹²Teeme irecu lui uliobo wädräji pana ge, piyepu teeme mope cabu puga ge bucurage krauni. Teeme cabu ngii puga ge, yepä nuuja te umle lica gyene, ngena ngii gyene. Tabe taatu gyene umle. ¹³Tabe lui cäbletääpe ca asigräneji ge, uudi cabu ituge iiglenuta. Teeme ngii lui Acejiyame me Mene gyene. ¹⁴Cabucewe caami cina teebine ingwe sicwisi, bulubulu cooso cabu seclige. Teepi jugi cäco bulubulu cäbletääpe cama ge. ¹⁵Bulubulu cooso cabu lui te tädige, teeme tage cabu ca girirage cubuturikä te tasatige. Tabe pui turikä ca cire yaapremalemepi gawe maramara biname bine. Tabe teebibine ayana suru ca cire yaawecetnäremepi. Tabe kokrerage Acejiyame me claabe ne cire yaaboclomtepi. Biname te lipu jäämungäjemuge waina kuu bine migi apirame, tabe pepu cirege Acejiyame me cubuyame bine ämungeja. ¹⁶Teeme cäbletääpe cabu piyepu wawe cabu ngii oogäräneji gyene egä,
 IYETA MOPE BINAME BIME MOPE BINAME,
 IYETA YAGEYAME BIME YAGEYAME.

¹⁷Puma cita ca cane mename seemo ne jepänine bimu cabu aclajuteji. Tabe baborage tagepogogo ca ala abayanige iyeta ele bime cabu me, lui cina cabu je uujanandinisi egä, “Naaclege, tabasecretnineye Acejiyame me babo soriyomu täapume! ¹⁸Naaclege gawe maramara mope biname bime mäju cibi me, cubu mope biname bime mäju cibi me, caami biname bime mäju cibi me, cooso bime mäju cibi me, teeme waadenenayame bime mäju cibi me. Iyeta biname bime mäju cibi me naaclege, aletnäneji biname bime mäju cibi me piyepu poto biname bime mäju cibi me, iyeta biname bime mäju cibi me modamoda biname cabu ca ngälu matimati me.”

¹⁹Puma cita ca cane jepänine drowä gwidape ne piyepu jepänimine gawe maramara mope biname bine piyepu teeme caami bine. Teepi abasecretnäneji gemi naace täapume cubu iicaname biname cama, lui te bulubulu cooso cabu tädige, piyepu teeme caami cama. ²⁰Drowä gwidape piyepu walya mename biname, lui te ciitaca mule itu

jaawenemepi teeme opo gaabe je, teebibine joomlisi. (Teeme pui ciitaca mule ca tabe ituge angletne-ja, lui cina drowä gwidape me cewecu ne itu yaacatanepesi, cuta teeme pana wawenäneji gwidape ne lui cina itu opo gaabe me yaacitanepesi.) Siige teebibine ireclota cama aajarisi uliobo puupu cabu me, luma niyarage lengo gwidape ngii sulphur ayenige. ²¹Teeme caami bine cubuturikä te eglecimige, lui turikä te tasatige pui me tage cabu ca, bulubulu cooso cabu lui te tädige. Iyeta ele cina teeme mäju bine erngäjimisi, ngälu camuge äbitinisi.

Satani te Cirege Ätäyäneji Lenaja Yepä Tausen Kämäge Ngalebora

20 ¹Cane puma cita ca jepänine, Acejiyame me mename seemo te cabucewe ca täinige kii cama piyemrage cupicu ne iitnaname, cuta teeme ayana seea puga ge. ²Tabe joomlige siible ne, pui sasaraige cobyame ne, Diyabolo ca piyepu Satani ca lui ne einenisi. Tabe jetäyige teebine yepä tausen kämäge täapume, ³ijarige piyemrage cupicu bora me, cupicu ne kii ca ermige, klaje jebenige tabe puma lenajame ngälu yepä tausen kämäge cina liba cire lapiripesi, siige tabe piba biname bine lica angletneja. Peei ingwe gaabe ca teebine cirege asata, iibira matikäli padare cabu lenajame ai gawe cabu.

⁴Puma cita ca cane jepänimine mope biname bime adnatera puupu bine piyepu lui cina adnatäreji ge puma. Teebibine conocäco ituge ceera atrana täapume. Cane cuta eei biname bime cable bine jepänimine, lui bine ituge budre me agleca, inge teepi Yeesu ne itu teitnejanumesi, piyepu Acejiyame me Mene ne itu tejanemumesi. Teepi lica ituge drowä gwidape ne awejena coo piyepu teeme pana wawenäneji gwidape ne. Teepi cuta teeme cewecu ne lica ituge acatena mangace cabu coo piyepu ime cabu. Teepi ireclota cabu me täcnärige, mope biname bime adnatera puupu cabu adnatäriige, siige Keriso cama gigri ai gawecewe ne ecanisi yepä tausen kämäge ngalebora. ⁵Poto budre biname cina ireclota me lica täcnärige, ngälu peei yepä tausen kämäge cina liba apirinini. Ai lui niinäce budre ca arpinera gyene. ⁶Babo gege gemi, lui cina budre cabu ca niinäce cirege arpinera; teepi Acejiyame me binamewale gemi. Uliobo puupu lui neeneni me budre gyene, tabe teebibine lica cirege oomlema, yepä teepi iiwäreja biname täapume cire yaacrajemepi Acejiyame täapume piyepu Keriso täapume. Piyepu teepi Keriso cama gigri cire yaacanepesi ai gawecewe ne yepä tausen kämäge ngalebora.

Satani ne Epremalisi

⁷Yepä tausen kämäge cina liba cire lapiripesi, Satani ne piba cirege asata cupicu cabu ca, siige iibira. ⁸Tabe cire waatnepi iyeta poto ta gawe maramara biname bine angletnejame, naace Googi piyepu Maagogi biname bine. Tabe teebibine cire jaabasecretne-mepi cubu iicaname.

Teepi epu bucurage gemi malu cabu koriyo liiyepu. ⁹Teepi ai gawecewe cabu eplidnärisi, Acejiyame me binamewale bime lenaja puupu ne jewaclomtisi, piyepu pui babo cewe ne tabe lui täápume singi. Yepä uliobo te täinige cabucewe ca, siige eglecimige teebibine. ¹⁰Satani lui te teebibine ituge angletneja, teebine ijarisi uliobo piyepu niyarage lengo gwidape ngii sulphur wädräji cabu me, niinäce liiyeme ituge ajara drowä gwidape naabine walya mename biname. Teeme puma peei mäpu cabu lenaja iyeteta gyene, ciye bimu.

Ceräcerägääbu Atrana

¹¹Puma cita ca cane jepänine bulubulu babo adnata puupu ne, cuta lui te adnatäneji gyene puma. Cabucewe piyepu gawecewe cina uucräsi teeme opo gaabe ca, siige teebibine ingwe ca lica cirege päpäna. ¹²Piyepu cane jepänimine budre biname bine matimati cabu ca ngälu modamoda me, teepi babo adnata puupu opo gaabe je jeclajutemige. Siige peba bine jepatnäjemisi. Cuta nuuja peba ne jepatnisi, naace ireclota peba ne, ngälu cäco ireclota päpäna täápume luma ngii oogäräneji gemi. Budre biname bine teeme mule ibi jitranimisi, peba cabu lipu oogäräneji gemi teeme poto cidi me. ¹³Malu te teeme cable bine sewecnimige, budre piyepu aadiri cina cuta teeme cable bine sewecnemäsi, siige teebibine jitranimisi teeme mule ibi, teepi ngena ituge wawenetnäja. ¹⁴Siige budre piyepu aadiri bine aajarisi uliobo puupu cabu me. Pui uliobo puupu lui neeneni me budre gyene. ¹⁵Piyeme cuta iyeta eei biname bine yiisabimisi, lui bime ngii lica ge ireclota peba cabu, luma ngii ituge acrana ngälu cäco ireclota päpäna täápume.

Kirece Cabucewe piyepu Gawecewe Cirege Lenaja

21 ¹Cane piba kirece cabucewe naabine kirece gawecewe jääpänine. Niinäce cabucewe piyepu gawecewe cina ituge apira, cuta malu te ituge apira. ²Cane cuta jepänine babo cewe, kirece Yerusalema ne, Acejiyame täápume lui ne ituge mara me wawena, tabe teeme bau ca täinige cabu ca. Tabe epu pana abasogäräneji ge, ngulebägrä ne lipu waabasogärusi tabe atejächlmuta äbitame. ³Cane nätecijige baborage tagepogogo te babo adnata puupu cabu ca iicana egä, “Ire, Acejiyame me lenaja puupu page biname bime cama gyene. Tabe teta cama cire yaanajepi, teepi teeme binamewale cirege. Tabe Acejiyamerage te ten cama lenaja, tabe teeme Acejiyame cirege. ⁴Tabe cirege teeme irecu cabu ca ele mäcu äciseja. Puma ingwe ca piba budre lica cirege, nuuja ngenecu mäpu lica cirege, ele lica, pita lica, inge sasa mule cina uja ituge apira.”

⁵Siige puma cita ca babo adnata puupu cabu lui te enajenige, jiicige egä, “Cane iyeta gwidape bine kirece me jewenenemine!” Tabe cuta cebine najige egä, “Ai mene ne yoogäri peba cabu, inge toraca

gyene piiyepu miiji gemi ätrungame.”⁶ Tabe cuta jiiçige, “Siige, iyeta gwidape cina wawenäneji gemi! Cane lui niinäcegaabayame piiyepu ceräcerägäabuyame, cane agedna piiyepu apira gäne. Laati te niyemecewe, cane conocäco yäacärune tabe nanime ireclota niye waja cabu ca daremu cäco.⁷ Laati te yuutrutuge, tabe cäme bau ca jääpänuge, egä cane teeme Acejiyame cirege, tabe cäme bägrä cirege.⁸ Yepä lui cina wälu ajiri birige Yeesu ne aitnejame, cuta lui cina teeme ätrunga bine yaabmaläcemusi, lui cina jugijugi mule bine jaawenanemusi, lui cina biname bine budre me yaaglecimusi, lui cina ero mule jaawenusi coo sargiyame birige, cuta lui cina mowäyame, piiyepu lui cina yiwäräjemusi uuje bine piiyepu ime ca wawenäneji gwidape bine, iyeta lui cina walya waatromininusi, teebibine cirege piiyeme iisaba, luma uliobo piiyepu niiyarage lengo gwidape ngii sulphur cina ayenäsi. Ai lui neeneni me budre gyene.”

Kirece Yerusalema te Tainige Cabu ca

⁹Pui seben Acejiyame me mename seemo lui bime seben disi puga ge ceräcerägäabu mäpu mule cama, teeme yepä te tädige cäme bau me, najige egä, “Tädi, cane naawabenine Ngulebägrä, Maamoi lui ne cire waacatepi, tabe teeme coga cire waanajepi.”¹⁰ Siige Aceji Seemo te cebine nacenanige, mename seemo te nacanige baborage podo caburage me. Tabe puma cita ca nawabige Acejiyame me babo cewe Yerusalema ne, cabucewe ca lui tainige Acejiyame bau ca,¹¹ teeme apaclyera cama toplacmeläjinige. Tabe epu pana toplacmeläjinige oplacmeläja kula liiyepu, epu yaspere kula liiyepu, päpäna taatu ge.¹² Tabe caburage atreji cama ge, piiyepu twelb grana cama ge, twelb mename seemo cina lui bine ire jaatwemusi. Grana yepäyepä cabu twelb Israela ingle bime yepäyepä ngii oogäräneji ge.¹³ Bimu acita gome ca nesae grana ge, kämäge poto ca nesae grana ge, bimu äpula gome ca nesae grana ge, uule poto ca nesae grana ge.¹⁴ Babo cewe me atreji ingle täapume twelb modamoda kula bine acranäneji ge. Teeme cabu Maamoi me twelb ätyepäneji biname bime ngii oogäräneji ge.

¹⁵Lui mename seemo te cebine mene najanige, teeme gol ca wawenäneji suru puga ge pui cewe ne atoneräjame teeme atreji piiyepu grana cama.¹⁶ Pui cewe me daamle piiyepu leca yepä ibi ge. Siige mename seemo te teeme suru ca etoneräjige cewe ne. Tabe neeneni tausen fooma hanred kilomiita leca ge, cuta daamle pepu ge, cuta cabu me galena pepu ge.¹⁷ Mename seemo te cuta atreji ne etoneräjige. Teeme cabu me galena lui sebenti miita ge. Biname te lipu suru ca mete ne yaatoneräjuge, pui mename seemo te pepu cewe ne etoneräjige.¹⁸ Atreji lui yaspere kula ca wawenäneji ge, piiyepu cewe lui golrage ca wawenäneji ge, glaasi pana, päpäna taaturage.¹⁹ Pui twelb kula lui ingle

gemi atreji täápume, maramara oplacmeläja kula ca abasogäräneji ge. Niinäce manu ingle kula lui yaspere kula ge, neeneni manu lui sapiri kula ge, nesae manu lui agate kula ge, fooa manu lui emeraldi kula ge, ²⁰faib manu lui sardenus kula ge, siks manu lui karneliya kula ge, seben manu lui krusoliti kula ge, eit manu lui beruli kula ge, nain manu lui topasi kula ge, ten manu lui krusoprasi kula ge, lebin manu lui jakiniti kula ge, twelb manu lui ametisti kula ge. ²¹Twelb grana lui miiri ca wawenäneji ge; yepäyepä grana lui yepäyepä modamoda miiri ca wawenäneji ge. Babo cewe me gaabe lui gol ca wawenäneji ge, iyeta päpäna taaturage, glaasi pana.

²²Cane iiwäreja mete ne lica jepänine puma, ingle Yageyame, babo kokre Acejiyame piyepu Maamoi, teepi puma cirege iyeteta lenaja, peei name pi nuuja ingle lica gyene mete täápume teebibine luma awejename. ²³Babo cewe me nuuja ingle lica gyene bimu piyepu maybe teeme apacylera täápume, ingle Acejiyame me apacylera te epacylärenige, piyepu Maamoi lui teeme lampa gyene. ²⁴Gawe maramara biname cina pui apacylera cabu cire waatnipesi, piyepu gawecewe me mope biname cina cire yaawademepesi teeme dogwe bine piyeme. ²⁵Teeme grana lica cirege armi, ingle ciye lica cirege. ²⁶Gawe maramara biname bime ngena dogwe piyepu miijimiji gwidape piti nemi, teepi piyeme cire yaawademepesi. ²⁷Yepä nuuja niyaniya mule biname cina piyeme lica cirege äbäcna, piyepu lui te ajiri cama mule jaawenimuge, cuta piyepu lui te walya waatromuge. Eei taatu cina cire yäbäcnepesi, lui bime ngii oogäräneji gemi Maamoi me peba cabu iyeteta ireclota täápume.

22 ¹Pui mename seemo te cuta nawabige ireclota niye baduge. Niye te päpäna taaturage ge, glaasi pana. Teeme mopecu lui Acejiyame piyepu Maamoi teeme babo adnata puupu ge, ²siige puma cita ca sewelenige babo cewe gaabe cole cabu ta. Pui baduge me neeneni potota yepäyepä ireclota uli puga ge, lui cina twelb gääbu kuu jääpänanemäsi yepä kämäge ngalebora, iyeta maybe gaabegabe yepä gääbu. Teeme laame lui maramara gawe biname bime pita miiji wawenename. ³Nuuja gwidape te lica gyene pui cewe cabu, Acejiyame te lui ne ägyi. Acejiyame piyepu Maamoi, teeme babo adnata puupu puma cirege. Acejiyame me kaakesea biname cina teeme täápume kaakesea puma cire jaawenepesi. ⁴Teepi teeme opo ne cire jääpänepesi, piyepu teeme mangace cabu Acejiyame me ngii oogäräneji cirege. ⁵Puma ciye lica cirege. Teepi nuuja singi lica lampa coo bimu apacylera täápume, ingle Yageyame, Acejiyame, tabe sine teeme apacylera. Teepi cirege mope biname me lenaja iyeteta, iyeteta.

Yeesu me Acnenuta

⁶Puma cita ca pui mename seemo te cebine najige egä, “Ai peba cabu lui mene, toraca mene gemi, piyepu miiji gemi ätrungame. Yageyame,

Acejiyame, lui te ngene atwana säacäranemuge teeme mename biname bine, tabe tityepige teeme mename seemo ne teeme kaakesea bägrä bine umle wawenename, egä ngena cina pagege watatarage äpletnera.”

⁷Yeesu apu jiicenige egä, “Itecijinege, cane mameta gäne otni. Gege gemi, laatibi jäätrungimusi ai peba cabu lui mene gemi ciige padare poto cidi me.”

⁸Cane, Yoane te nätecijuji ai mene piyepu jepänemujine iyeta ai gwidape bine. Lui mename seemo te nawabehnäruji iyeta ai gwidape, cane siige natramuji teeme ernge gawe me teebine opo gaabe me acitame.

⁹Yepä tabe najuji egä, “Peei ne gone jaawenute! Cane yepä kaakesea bägrä gäne Acejiyame täapume maane liyepu, mäame binamewale Acejiyame me mename biname cina liyepu, piyepu iyeta lui cina ai peba mene yäatecijemuge. Maane cebine gone opo gaabe me nacitute, yepä Acejiyame ne opo gaabe me eciti!”

¹⁰Tabe cuta najuji egä, “Ai peba cabu ngena mene gemi ciige padare täapume, gone yäämlitumi biname bime bau ca, ingle padare mameta gyene ai gwidape cina äpletnerame. ¹¹Yoo, laati bemi niiya mule biname, teepi pepu lenajame; laati bemi jugijugi muleyame biname, teepi pepu lenajame; laati bemi miiji mule biname, teepi pepu lenajame; cuta laatibi Acejiyame täapume mara me ituge äbita, teepi pepu lenajame.”

¹²Yeesu jiicenige apu egä, “Itecijinege, cane mameta gäne acnenuta. Cane cäme daremu bine cire yaawademepene biname bine ceerame teeme wawenetnäja ibi. ¹³Cane niinäcegaabeyame piyepu ceräcerägääbuyame, cane agedna piyepu apira gäne.

¹⁴Gege gemi pui biname, lui cina teeme cäbletääpe bine jugi cäco jääcisäjemus, naace täapume teeme piba conocäco pisi nyene kuu loolo me ireclota uli cabu ca piyepu grana cabu äbäcname babo cewe cabu me. ¹⁵Yepä, babo cewe me kaake poto cidi ca cirege lenaja jugijugi mule biname, mowä piyepu piiseba mule biname, sargi mule biname, budre me aglecayame biname piyepu lui cina yiiwärajemus uuje bine piyepu ime ca wawenäneji gwidape bine, cuta lui cina baborage singi walya mene me, siige iyeta padare cabu walya mene jiicanimusi.

¹⁶Cane Yeesu te cäme mename seemo ne ituge ätyepa ai gwidape poto cidi me weebibine jajanename ätrunga maramara ingle cabu. Cane lui Daawida me kaakesaare gäne, cane jamyacu apacliyera Guji Wale gäne.”

¹⁷Siige Aceji Seemo piyepu Yeesu me binamewale cina jiicenis egä, “Tädi!” Iyeta lui cina yäatecijemuge ai peba mene, teepi cuta miiji iicana egä, “Tädi!” Iyeta lui cina niyemecewe gemi piyepu singi nanime, naaclege daremu cäco ireclota niye nanime.

Ceräcerägääbu Umlu Mene Gyene

¹⁸Cane Yoane, cane singi gäne umle mene jajime lui te yäatecijuge, ai peba mene ne liba yaacnemusi ciige gwidape poto cidi me: maane liba

nuuja mene alengläcita peei cabu, Acejiyame te cuta nuuja gwidape ne cire yaacitepi mäame daremu cabu. Tabe peei mäpu cire nääcäranepi, ai peba te lui bine jeitnäjenenemige. ¹⁹Cuta maane liba nuuja mene ne yääyebtingtute ai peba cabu ca ciige gwidape poto cidi me, Acejiyame te cire yaawademepi mäame bau ca, tabe ngena miiji täapume jiicenige ai peba cabu. Tabe meebine cire niibepi ireclota uli kuu loolome piyepu Acejiyame me babo cewe cabu me otnime. ²⁰Lui te jeitnäjenige, egä ai peba mene toraca gyene, tabe jiicenige egä, “Toraca gyene, egä cane mameta gäne otni.” Yoo siige, tädepi Yageyame Yeesu!

²¹Mime Yageyame Yeesu me miiji te lenajame iyeta Acejiyame me binamewale bime cabu! Mene ngälu peese.